





荆川集


97.451  
5539  
38

38





十	𠄎
川	川
𠄎	𠄎



卷	緒	乙	宋	卷	誰	盛
氏	用	肅	熙	壬	辰	二
南	堂	本	壘	彭	杜	輯
補	遺	一	聲			

欽定四庫全書總目卷五十三

廣右戰功錄一卷

明唐順之撰順之字應德一字義修武進人嘉靖己丑進士官至右僉都御史巡撫淮揚天啟中追諡襄文事蹟具明史本傳此錄述右江參將都督同知沈希儀討平廣西諸蠻事順之工於古文故敘事具有法度明史希儀本傳全採用之惟錄稱希儀為臨淮人而史稱貴縣人稍有不同蓋希儀世官指揮史據其衛籍言之而錄則仍書本貫也其書已載荆川集中此為袁褰摘出錄入金聲玉振集者也

欽定四庫全書總目卷一百七十二

荆川集十二卷


明唐順之撰順之有廣右戰功錄已著錄順之學問淵博留心經濟自天文地理樂律兵法以至句股壬奇之術無不精研深欲以功名見於世雖晚年再出當禦倭之任不能大有

所樹立其究也仍以文章傳然考索既深議論具有根柢終非井田封建之游談其文章法度具見文編一書所錄上自秦漢以來而大抵從唐宋門庭沿溯以入故於秦漢之文不似李夢陽之割剝字句描摹面貌於唐宋之文亦不似茅坤之比擬間架掉弄機鋒在有明中葉屹然爲一大宗至其末年遁而講學文格稍變集中如與王慎中書云近來將四十年前伎倆頭頭放捨四十年前見解種種抹殺始得見些影子云云則薰蒸語錄與之俱化分別觀之可矣其集爲無錫安如石所編王慎中爲之序蓋二人早年論文不合及其老也客氣漸盡乃互相傾挹云


慎行自少卽聞外大父荆翁先生古文今文世世師也已乃誦讀今文愛玩之而不敢學已又誦讀古文愛玩之而益不敢學而反浸淫於粉藻謁蹙於彫鏤者若干年而於文茫不得其津梁比入仕從館閣中長者請問古文所宜師法長者首稱先生大家他粉藻若彫鏤者不數也閒乃用以相誡然余初仕旣應酬不可謝心雖祈嚮先生而識力才地頗淺淺單怯姑借徑於粉藻若彫鏤以爲觀而又厭不肯就一進一退一彼一此者復若干年獨時時知愛玩先生視初時與口增甚而已從甲寅歸杜門兀坐諸應酬文一切盡謝年餘而後醒悟昔人謂唐之韓柳卽漢之馬遷宋之歐蘇曾王卽唐之韓柳文章有真千古一脈蓋非虛言今卽謂國朝之先生卽宋之歐蘇曾王唐之韓柳可也余嘗取國朝文自方楊正始外特以南城羅北地李晉江王與先生共類纂一集以爲深文高文卓然大家無踰四先生矣開示知文友人友人賞之而以爲羅李工韓柳王唐工歐蘇余心頗躋其言今而後知匠心獨到

得文章真傳者先生一人而已先生造理醇而議事極密立格高而命詞獨溫無一語不近人可曉然明而又終無一語近人可形似摹竊者居閒反覆誦讀風神輝映旨趣機躍爲韓爲柳爲歐蘇曾王者若彬彬雜出乎簡端卒欲指定以何篇擬之何家何語做之何篇而終不可得也至一番議論輒一番脫卸重重結束復重重抽換如宮商之奏首尾開闔天巧不可凌湊又如萬疊山谷愈深愈變令人莫追憶所從入然一指顧則劃然天開一揮灑則蔚然雲會此則先生所獨到蓋創韓柳以來所不必有之局面而實暢韓柳以來所必有之精神於是知先生之得爲真先生居家不妄受人一緡諸叩文者則嚴卻之欲兀然作不識字道人此其位地何如也近世之煩爲文者每每有叩之無不立應卽世情交好多牽不能割斬人適不斲自適算目睫不算久遠卽粉藻靡而曾不知赧彫鏤苦而曾不知藹蓋真文一脈之難言也久矣先生居家日蚤日久九流百代無不網羅無不貫穿行今逾艾耗矣卽

古文職業臨書欲臥竊恐今之醒悟者之未爲得而曩之不敢學者之未爲失也特以識一念之祈嚮焉外孫孫慎行謹識



吳之有文學舊矣諸樊爲國斷髮之治未變蓋方甚陋而公子札  
已能盡通易詩書禮樂六藝之文以觀於中國則名卿碩士有愧  
於其所知悅其說之博雅而慕之知不及孔子教於洙泗來四方  
之學者則言偃踰江蹈淮而往游焉卒以文學列於大賢之科南  
方之精華爲之盡發而孔氏之道資其言之有文以行於遠至於  
今爲烈蓋其盛如此畫長江大湖以爲國方地千餘里林麓川澤  
之美殆不可數而光英沖粹之所漸涵磅礴於其間二人而已雖  
其甚盛而亦豈非難哉吾於二人讀其書觀其言尚而友之而庶  
幾知其人於今所見而及與之爲友又得一人焉毗陵唐應德也  
君於學蓋所謂得其精華於其言可謂有文而必行於遠者也其  
文具在學者苟讀焉而思思焉而有以得之則知其心之所通於  
季札孰爲淺深言之所成於子游孰爲先後有不可得而辨者矣  
君仕爲翰林編修復爲太子司諫皆以守道直己之志棄去不啻  
弊蓀有吳公子輕千乘之國之節其文之以禮樂得言氏之傳而



廉隅操行必謹於一介之取予剛果自斷不可以威武利祿誘屈也尤足以闢夫媮懦憚事無廉恥而嗜飲食之誚上下二千餘歲之閒吾謂吳有文學三人焉不為過也季札之生其國雖尚陋然先君端委之遺教猶存而子游得仲尼為之依歸其成此非難也唐君獨起於千載之後追二人者而與之並豈不為尤難哉君行年四十其學將進而不止其為文將日益富而且精予之所見如此已可傳也無錫安君如石子介慕君之學得其所為詩文彙而刻之以與同好者共安君之趣尚如此豈凡人之所及哉嘉靖己酉冬十月望晉江遵巖居士王慎中道思甫序

唐荆川先生文集目錄

○卷之一

詩

游西山碧雲寺作得悅字

慶壽寺齋宿

寓城西寺中雜言五首

同孟中丞游龍泉寺二首

普濟寺同孟中丞作

秋夜

禁中遇雨

夜霽

十五夜旅懷

望太行

山行即事



泛黃河

息中山亭子

雨霽約孟有涯中丞遊山孟先出郭追之不及

送焦提學往貴州

送李推官赴高州

送蔣藩幕赴閩中

休沐家居簡陳約之

送王生歸蜀

送何學官往金壇

送陳學官往福寧州

送莫子良擢舉東歸

答陳編修約之柏鄉見寄

送蔣尉赴金華

送程翰林松溪謫居朝陽四首

送孔上公助祭太學歸闕里時賜袞衣一襲

春夕皇甫膳部見過索觀鄙作留夜坐

輓張舍人二首

汲縣謁比干墓

中嶽

游嵩山少林寺

冬至南郊

奉天殿慶成侍宴

朝謁長陵

奉命分祀孔廟作

觀中州進賀長至表箋恭述時寓信陽

登孫登嘯臺

銅雀臺二首

嵩陽宮柏

詠天壇梅花

詠蛺蝶花

狂歌行贈孟中丞有涯

皇陵行

從軍行送呂兵曹募兵遼海

送朱建陽

送陳貢士刺上思州

滎陽行

金臺行

結客少年場行

歌風臺

同院寮觀閣中芍藥作

南苑

午日庭宴

登毘盧閣

遊龍門

龍泉寺對雨

永年公館夜宿

龍泉寺懷顧南田使君顧以公事不至復惠酒助看山之興

詠崔後渠書屋

題張學士仰宸樓樓藏賜書

題張學士陽峯卷

送張學士歸蜀省親

潞河別林汝雨提學浙江

送黃參政赴陝右

送項膳部遷之南行兼呈劉祠部

送高行人使琉球

送王侍讀赴南都

送樊大夫會朝長至

送周雲卿之任通山

寄周中丞備禦關口

答周約菴中丞九日樂城道中見贈

送施貢士子羽南行

送人上陵作

覽任少海吏部慶都留題悵然懷人因次其韻

贈袁御醫芳洲

張相公壽詩

趙州懷古

呂翁祠堂

題劉蕡祠

朱仙鎮觀岳將軍廟

和陳編修約之禁中雪詩二首

詠夾竹桃

和詠霧中榴花

九月晦日鈞州公館見菊

村居二首

村夜

同皇甫子循遊橫山二首

夜宿王氏莊

暮春遊陽羨南山四首

同林尹遊會真庵

遊馬跡山宿許道士房有贈二首

題閩泉川副使莊

謝病贈別高參政子業

罷病歸訪王山人含真

送王良醫往岷府

贈王潼谷出守保定

贈春巖王尹朝京

送白尉往湖州

送胡主事權稅荊州

丹陽別王道思三首

夏日聽沈君彈琴詩三首

贈宜興張醫二首

次韻贈陳后岡

送李文與赴河南郡倅任

次韻答張戶部羽卿

送董兩峯應舉

九月八日作

送真州蔣生至宜興親迎歸

送莆田方生自宜興歸應試

送林宜興遷官南部

題東石草堂圖贈黃松江

雙壽圖歌為段翁作

贈王君五十歲

題龍圖

山莊閒居

遊神墩寺次壁閒韻二首

登墩

廣德道中

泊淮上作

淮上五日泛湖同蔣別駕世和

聞復官報寄京師友人

代柬寄京中舊遊

寄贈曾郎中再入禮部

家居贈別陳僉事約之

臨清十五夜東陳太史約之

贈陳僉事約之生日

崔鎮道中晚望懷陳約之

贈別義興林尹遷官

次韻贈施道人

寄題顧東橋侍郎載酒亭

送樊醫歸南昌

贈張地官督賦江南

贈南都莫工部子良夏至齋宿署中

送彭府倅進賀聖節表

宜興舟中讀徐養齋詩稿因思奉別之久悵然有懷二首

覽徐養齋見懷毛古菴及小子之作存沒感懷和韻

和徐養齋移居二首

題贈施心菊醫士

贈江陰陳君

寄劉範東提學

題伯祖平樂守素齋翁像

和朱子學遷居

程副使輓詩

元夕詠冰燈

○卷之二

詩  
庚子歲海印寺再舉同年會紀事四首

得薛君所寄三游紀興刻中有楊方洲見懷之作益別去已十餘

年矣撫卷慨然用韻奉答

送黃翠巖赴松江推官任

送沈君守寧波

送陸舍人調遼府長史

送王舍人往崑山為顧相公營墓

聞石屋彭君置生棺有感為賦四詩

寺中訪後渠崔侍郎不遇次韻

濟上別錢副使

點蒼山歌贈雪屏趙考功

李中麓文選藏書歌

詹府讌集奉和上宰松臯公三首

送王翰林浙江兵備副使

送鄒東郭掌南院

贈吳山人歸自京師

贈許太宰

宿雙塔寺林東城羅念菴誤於郭外相尋不遇有作見寄用韻奉

答

次韻贈湯將軍

自述

宿游塘書懷二首

題陳渡莊

岳亭遇盜次韻

病中試新茶

泊舟郭外有感

同褚生滔徐生大復夜過城濠水榭作二首

遊永慶寺示諸友

題金山寺付僧惠傑四首

宿荆溪上塘菴述懷余向曾遊此匆匆十年矣

登常山山亭次壁閒韻二首

過清溪莊值主人不在

題清溪莊三首贈顧副使

答陳澄江僉事邨居韻八首

贈玉山人

贈山陰陳千戶病臥毘陵三首

周蓮渠以詩問病次韻

再疊前韻二首贈蓮渠

憲副饒湖田見過陳渡草堂賦此為贈

贈郡倅綱運

送人赴真定幕

贈馮午山提學

贈吳賓湖

題徐君淵泉號

贈王思東號王君祖為中舍

贈熊南沙郡倅入賀萬壽節三首  
王子陸生南陽褚生滔赴試與之敘別不覺坐至夜分因作二首

常山懷羅念菴

壽詩

董進齋壽詩

蔡南村壽詩

壽王生革母

法慕菴六十

贈徐學琴六十

題孤山林隱居祠二首

岳將軍墓二首

吳江三忠祠

松關

梅塢

筠徑  
石丈

蒼翠亭

會遠樓

元陽洞

小虹橋

迎仙館

禮星臺

靈芬精舍

山田

山池


茅亭

良友軒

聽鶯閣

賀陳吏部父母榮贈二首

己酉八月十八日觀湖作



賀金翁夫婦雙壽詩

題贈喬僉事兼為乃翁封君壽

希周兄八十

石湖王傅辱觀拙集見贈長句二十三韻奉答一首

題偶耕書屋送謝右溪西歸兼柬左溪

題夏中書畫竹

卓小仙草書歌

楊教師鎗歌

古鏡歌

峩嵎道人拳歌

日本刀歌

劍井行

為謝參政與槐題青白蓮畫

悼僕鈕才





遣鶴

紉蘭

釋麋

哦松

○卷之三

詩

病中秋思八首

病中秋日作四首

有感

陳渡草堂二首

小樓宴坐二首

又疊前韻二首

莊中作

自述

有相士謂余四十六歲且死者詩以自笑古人云死生亦大矣此

謂趁日力以進道者言之也苟不進道總是虛生修短何辨焉

苟於道有見處夕死可矣然則死生詎足為大哉

囊癰臥病作三首

瘡病作

小集為人所刻

靈芝寺同童元功宴坐

登屠翰林仍臺作二首

次人憂旱作

再遊清溪莊值主人不在次韻

至常熟陳中丞白訓導邀登福山看海二首

金澤寺中寄松江友人

松江金澤寺四首

天寧寺塵外樓四首

題湖上廢寺二首

題龍池菴三首相傳伏虎禪僧開山處山頂有龍井蜥蜴見則雨

贈菴中老僧僧解相人術少嘗遊歷江南晚歸菴中

遊宜興海會寺作

贈黃子晦

寄周臺官二首

家居喜袁芳洲相過賦此為贈三首

次韻贈薛仲常

歲暮有懷諸子

贈張贛州致仕還吳次達夫韻

贈宜興王丞次韻

答朱刑部士南見寄

同萬鹿園宿工文菴次韻有贈

次葉師與諸生講書鐘樓寺聞鐘作

養病道院忽張君見訪不值奉寄

答贈胡柏泉

送郭無錫擢南曹主事

贈督府張牛洲兼柬周中丞石崖四首

尹洞山祭酒枉顧草堂有作見贈次韻二首

又疊二首

贈都督萬鹿園四首次思節韻

詠俞虛江參將四首

送曹子泰自大理出守漳郡

萬思節以集中無名作詩見貽二首

萬思節工於詩而近又學射次韻答之

次萬思節韻贈蕭芝田二首

題王世新一枝窩三首

夜歸陳渡草堂時新與諸子別去有懷二首

癸卯送仲弟正之赴試

已酉送兩弟正之立之赴試

送諸從遊應試二首

送馮子聲赴試

送褚生酒赴試

鄱陽別方道人

中秋夜同陳澄江張夢麟城濠泛月

和張尚書甬川新修池亭奉母登憩作

贈蔣璞山封君

贈張通政

用韻自述

壽張通政

壽陸師慎齋七十

曹霜崖六十

司訓殷龍巖壽詩

楊醫士六十

褚怡閒六十

贈宜興閔翁八十壽詩

贈天寧寺僧八十

懷竹叔壽詩

楊醫士壽詩

贈丹陽湯孺人壽詩

謁文敏楊太師墓次江提學韻

北郭謁宋鄒道鄉文忠公墓

讀東坡詩戲作

喇嘛翠峯老僧輓詩三首

錢心漁輓詩

雪詩和蘇韻十首

家僮自野田攜黃菊二株至軒中感而有作三首  
漂布架二首

鞦韆架二首

病中食江魚作

弟兄次江魚詩韻深不稱意偶坐水榭無事再疊前韻教之

次韻題王孟端春流出峽圖

山居

讀王遵巖所為拙集序文自嘲四首

紀夢

有司查腳色二首

游塘候巡公四首

海上凱歌九首贈湯將軍

南征歌十二首

塞下曲贈翁東厓侍郎總制十八首

偶感十二首

觀道士祈雨二首

歸自金陵宿白土

酬徐養齋尚書見懷之作亦以少頌盛德并為扣關先容云耳二

首

送楊訓導擢曹州掌教二首

贈徐愛杏山人詩有序

題贈段紫峯

秋日書客童君見過賦此為贈

題陳推官羅江號二首

題寶華和尚卷

贈王和尚住善卷

自述贈寫真毛君

贈曹星士一江號

自述并贈曹君

曉起觀猫捕鼠

題畫

廉使廖東雩喪後開所惠地黃酒臨觴慘然

贈儀真沙君

贈史君漁沙號

華補菴三度惠酒而此番所惠參酒者絕清冽可人雖味甚濃厚

而置之杯中淡若無色可謂嘉品因劇飲至醉遂成口號奉謝

三首

食石首魚又得鯧勒二魚喜作口號向時石首每至郡鯧勒亦不

至也非海氛漸息何以有此

○卷之四

詩

三屯營閱兵薊鎮總兵開府處

喜峰口觀三衛貢馬

自乍浦下海至舟山入舟風惡四鼓發舟風恬日霽波面如鏡舟

人以爲海上罕遇是日行六百五十餘里

謁夷齊廟二首

古北口觀降虜步射復戲馬馳射至夜

山海關陳職方邀登觀海亭作

盧龍行

臥病作二首

至職方作余初釋褐補官武選主事今適三十年

再官京師懷趙浚谷中丞

密雲閱兵作

渡潮河

夜上石塘嶺關

石塘道中

古北口城此城雄據山頂蓋徐武寧之經略也

宿黃厓營

遊遵化湯泉

登喜峰古城時三衛貢馬散牧塞外

曉發喜峰

入秋久矣餘熱尚在閏月十五日太平寨始見秋色

月下小坐書懷

寄姜白二子

薊鎮憶弟正之試南都

還姜白二子衣

副總兵馬芳芳陷虜中十二年而歸在虜中亦稱為驍將

謁夷齊廟

八月五日順義道中望關時近萬壽節四日也

順義公館次壁間韻

登懷柔城二首

黃花鎮拜聖誕

月夜度蛟門

三沙抱病夜坐東梅林督府

和陳黃潭東歸一首

浙中流言王游擊喪師二三千者又聞總督梅林公將至太倉詩

以自咎并以志喜云耳

三沙病後夜起翫月書懷

海上歸來病手足瘡兼血疾伏枕

赴官揚州與左妹夫兩弟鶴兒白婿登金山坐禪房一首

題牆子嶺公署中偃松署本參將府也

游湯泉四首

宿七家嶺驛次壁間韻

食蒜

題豐潤寺古鐘

游鐵壁

銀山寺說法臺

橫嶺

七夕公館憶海上二首

賦

游盤山賦

○卷之五

書

答顧東橋少宰

答張甬川尚書二首

寄劉南坦

與王龍溪郎中

答王南江提學

答俞教諭

答戚南玄

答王生宗道

與唐一庵

寄黎知州

與鄭淡泉文選

答洪方洲主事

與王湛泉文選

與陳後岡參議

答屠漸山論德

與田巨山提學

與二弟正之

與薛方山郎中

與張西磐尚書

與王體仁

與王堯衢

答周約菴中丞

答周七泉通判

與陳兩湖主事

○卷之六

書

寄黃士尚

與項甌東郡守

答江五坡提學

答廖東零提學

與應警菴郡守

與應警菴提學

答馮午山提學

與王北崖蘇州三首

與胡青厓同知二首

答林鎮江異峯

答茅知縣鹿門

與裘剡溪推官

答呂沃洲御史

與張本靜二首

與薛畏齋副使

答洪方洲主事

與蔡白石郎中二首

答皇甫柏泉郎中

與與槐謝翰林

答喻吳臯御史

與李中溪知府



與胡柏泉參政

與李少卿中麓

答姪孫一麟

答洪方洲

答王龍溪郎中

與羅念菴修撰

○卷之七

書

與楊椒山

答楊小竹

與洪方洲郎中二首

答殷生原學

與程松溪司成

與沈石山僉事

與劉寒泉通府

答王遵巖

與聶雙江司馬

與姜編修廷善

與華郎中補菴

與陸五臺儀部

與季彭山

答姪孫一馨

答徽州汪子問繼祖母之喪

辭宜興諸友為亡妻舉奠

與人論祀鄉賢

與莫子良主事

答茅鹿門知縣二首

與洪方洲二首

與王遵巖參政

與楊朋石祠祭

與萬思節主事二首

與顧箬溪中丞二首

與卜益泉知縣

答華補菴郎中

答蔡可泉

○卷之八

書

與呂通判竹嶼

與安子介

與白伯倫主事

與萬思節僉事

與董后峯主事

與洪方洲主事

與雷古和提學

答徐存齋相公二首

答翁東厓總制二首

答曾石塘總制二首

寄趙浚谷

與趙浚谷中丞

與河南李中丞石疊

與萬兩溪吏部

與趙甬江司空

與尚仰山巡按二首

與趙尋齋巡撫

答金前滌郡守二首

與曹子泰評事

與董後峯憲副

與李兵備

與劉南坦尚書

與張龍坪兵備

與羅念庵

王鑑川兵備

○卷之九

書

寄內閣及本兵諸老二首

與胡梅林總督十三首

與王芳湖中丞

與陳黃潭巡撫

與朱肅菴巡按

與翁見海中丞

答萬思節參政二首

與楊朋石祠祭

與白伯倫儀部三首

與陳蘇山職方

與陸東湖錦衣都督二首

與何總兵柏村

與俞總兵虛江二首

與李石麓少宰

與吳筠泉宗伯

與楊虞坡司馬二首

與喻吳臯中丞

與王稚川少卿

與李克齋侍郎

與章陽華中丞

與萬兩溪少卿

謝歐陽石江巡撫

與歐陽石江巡撫

與郭似菴巡按

答舒雲川巡按二首

與陳遜齋巡按

與賈太守

○卷之十

書

答李中谿御史

與周約菴中丞論項守

與魏立峯憲司論呂提舉

與葉東園御史

與徐少初縣尹二首

答符松岩郡守

與呂沃洲巡按

答曹巡鹽

與李龍岡邑令

與徐養齋尚書

與人論旱荒

與呂沃洲巡按

答施武陵

與鄭戶部

與王北厓郡守

答王北厓郡守計均徭二首

答蔡可泉判官

與吳峻伯縣尹

與金攝山縣尹

○卷之十一

序

中庸輯略序

明道語略序

季彭山春秋私考序

巽峯林侯口義序

筆疇序

王君注握奇經序

江陰縣新志序

鄭君元化正典序

右編序

左編附序

文編序

雜編序

福建鄉試錄後序代

東川子詩集序

前後入蜀稿序

山堂萃稿序

劍泉奏議集序

聲承集序

吳孺人輓詩序

鈴山堂詩集序

董中峯侍郎文集序

○卷之十二

序

石屋山志序

贈彭石屋序

送太平守江君序二首

送彭通判致仕序代首

贈竹嶼呂通判還郡序

贈蔡年兄道卿序

贈宜興尹林君序

贈邑侯王春巖獎勸序

贈宜興令馮少虛序

送柯僉事之楚序

贈郡侯郭文麓陞副使序

送邑令李龍岡擢戶部主事序

贈訓導邱君序

贈李司訓遷官臨安序

送陸訓導序

贈何沈兩公歸蜀廣序

贈張方士序

送第上人度海謁觀音大士序

葉包菴先生壽序

薛翁八十壽序

羅君八十壽序

李封君七十序

陳封君六十壽序

陸慎齋先生壽序

書水西集

書錢遇齋高尚卷

書地理鶴岡况君卷

書王氏傳家錄後

○卷之十三

記  
重修宜興縣學記

重修涇縣儒學記

重修瓜州鎮龍祠記

重修解州關侯廟開顏樓記

常州新建關侯祠記

常熟縣二烈祠記

零陵縣知縣題名記

廣德州同知蔡侯政績碑記

鎮江丹徒縣洲田碑記

裕州均田碑記

建陳渡石橋記

華氏義田記

救荒滄記

大觀草堂記

西峪草堂記

任光祿竹溪記

永嘉袁君芳洲記

吳氏墓記

休寧陳氏墓廬記

吳氏石亭埠新阡記

胡質棺記

敘廣右戰功

卷之十四

說

晉齋說

鄭氏三子字說

僧承基字說

續猫相乳說

銘

象梳銘

鏡銘

銅雀硯銘

鼎硯銘

半月硯銘二首

黑石硯銘

宛山石硯銘

方硯銘

方圓硯銘

小硯銘二首

斧硯銘

荷葉硯銘

誄

王御史毅齋誄

并集目

三

贊

徐司徒毘陵陳侯像贊

杭中丞雙溪像贊

丁近齋參政像贊

古菴毛先生像贊

弘齋黃先生像贊

蔣雲壑像贊

王思東像贊

吳南圃像贊

吳南洲像贊

運使黃慎齋像贊

殷教官石城像贊

某教官像贊

祭文

并集目

三



啓聖祠祭文

永州祭柳子厚文

祭萬古齋文

祭萬希菴文

祭白洛原文

祭邱思菴文

祭楊細林文

祭孫南野太僕文

祭胡評事省齋文

祭先考有懷府君文

祭祖廟文

祭弓矢文

祭六纛司旗牌司刀之神文

祭刀文

○卷之十五

誌銘

僉事孫公墓誌銘

運使張東洛墓碑銘

吏部郎中薛西原墓誌銘

吏部郎中林東城墓誌銘

刑部郎中唐嚙菴墓誌銘

禮部郎中李君墓誌銘

戶部郎中林君墓誌銘

施推官墓誌銘

松陽知縣胡君墓誌銘

興國州同知徐公墓誌銘

信豐訓導殷君墓誌銘

趙府奉祀正王君墓誌銘

都督沈紫江生墓碑記  
指揮僉事湯雪江墓碑銘  
儀賓李公墓誌銘

○卷之十六

誌銘

封知府朱公墓誌銘

封知縣張公墓誌銘

鈍齋吳公墓碣銘

茅處士妻李孺人合葬墓誌銘

秋野殷公墓誌銘

蕭孺人墓誌銘

盛孺人墓誌銘

楊孺人旌節碑銘

王母繆孺人墓誌銘

蔡母鄒孺人墓誌銘

賀氏孫楊二妻墓誌銘

楊母唐孺人墓誌銘

吳母唐孺人墓誌銘

王冢婦唐孺人墓誌銘

封孺人莊氏墓誌銘

弟婦王氏墓誌銘

行狀

月樓唐翁行狀

程少君行狀

○卷之十七

墓表

春坊中允方泉李君墓表

戶部主事陳君墓表

按察司照磨吳君墓表

普安州判杭君墓表

都察院都事秦君墓表

華三山墓表

莆田林氏先墓表

彭翠巖處士墓表

傳

周襄敏公傳

陽谷吳公傳

萬古齋公傳

李宜人傳

章孺人傳

俞孺人傳

葛母傳

○卷之十八

雜著

雁訓

讀春秋

書河圖治書

書秦風蒹葭三章後

書王明齋卷

書丁近齋示孫卷後

書王龍溪致知議略

書岳將軍題大營驛

書醫施氏婦事

瘞河壩枯骨誌

書瘞枯骨志碑陰

跋自書康節詩送王龍溪後

跋周東村長江萬里圖後

書黃山谷詩後

跋李懷琳書絕交書後

跋趙松雪書道德經後

跋異僧書心經碑後

數論五篇

句股測望論

句股容方圓論

弧矢論

分法論


六分論

舊刻先襄文公文集十七卷外集三卷坊刻既多闕失家藏舊板亦歲久漫滅不復成書壬辰歲承乏泚之德清簿書之暇與山陰劉子正誼訂誤補殘及兒子少游共相編

次正集十八卷外集四卷正在開雕量移之信適至為時匆遽無暇細勘仍不免於訛繆而外集尚未及授梓至文武左右儒裨諸編左氏始末史漢鈔諸儒語要諸儒文要批選朱子歷代神機句股算法獉獉歷批本四元寶鑑奇門六壬翻擎太乙諸書世無善本又卷帙浩繁無力剞劂未得公諸同好則不能無遺憾焉康熙五十一年八月朔日六世孫執玉謹識

唐荆川先生文集目錄畢

光緒乙未武進盛氏思惠齋刊宿松高駿烈陽湖吳文郁江陰謝寶琳全校



唐荆川先生文集卷之一

武進唐順之應德

詩

遊西山碧雲寺作得悅字

端居滯文翰久與賞心闕出沐乘休豫尋幽展懽悅涉澗俯潺湲  
攀巒面巖岫邈哉神臯奧居然靈境別夷峻疏深池塞坎構崇稅  
浴室盪陽泉冰井蔭陰穴躋險惕暝眩迷迴欣超軼密林嬉猿獮  
遠峰挂虹霓宵看朝旭升晝見昏星列葑豐光乍熹崖懸曜先晰  
景會萬象昭跡睽百慮絕巖棲庶可希從茲謝塵轍

慶壽寺齋宿

獨坐花宮月疏鐘報曉晴地超三象外人覺萬緣清茹素分僧飯  
觀空入化城真詮今已悟靈畏毒龍驚

寓城西寺中雜言五首

金馬違朝謁雲林久卧疴堦寒鳴蟪蛄庭古蔭藤蘿東帶知圍減  
觀書厭帙多無人來問疾獸坐似維摩

少年好疏懶遂與性相安經月常忘沐逢人或不冠鼎裏金將化  
囊中玉可餐解言脫屣易豈憚拂衣難  
緇塵坐自染白社偶相尋俗子慚玄度名僧卽道林三生空有偈  
五蘊本無心說法何須難忘言悟已深  
誰言龍藏遠亦在鳳城旁塔湧金銀界筵開功德場常明瞻慧月  
利涉藉慈航沈痼還能遣齋心奉藥王  
秋來不覺蚤落葉忽已繁物化每相代吾生尙何存微材同樗櫟  
僻地當巨園竊慕東方子一官堪避諠  
同孟中丞游龍泉寺二首  
山深人不到僊侶暫相從金馬聯驄馬晴峰映雨峰竹嶼今棲鳳  
花潭舊伏龍方欣窺妙偈遽擬謝塵蹤  
寶地風塵絕琳宮日月偏雁來還繞塔龍去尙留泉戶裏天花落  
空中梵樂傳遠師休禁酒客醉欲逃禪  
普濟寺同孟中丞作

宛轉雲峯合微茫鳥路通閒來竹林下醉臥石房中陰磳泉先凍  
陽崖薜尙紅攀蘿探虎穴憇石俯鮫宮上客思留帶山僧不避聰  
夜深清嘯發流響入寒空

秋夜

捲帷望秋月月皎心亦清牀下寒蟲響庭前落葉盈漢陰鮮機械  
河上多道情一適萬事畢栖栖何所營

禁中遇雨

紫閣肅陰陰重門寒意深忽看百里霧來作九秋霖灑道先清蹕  
霑花度禁林楯郎方夾陛雨立溼衣簪

夜霽

秋月澄初霽退公方掩閨稍聞金柝動坐望玉繩低巢鳥喧餘溼  
庭花落故畦羈人驚候變燈下理寒絺

十五夜旅懷

暫輟明光草言從洛下游塵沙兩河夕風雨二陵秋鏡有潘郎鬢

囊無季子裘更堪三五夜獨自下西樓

望太行  
北望太行山嶽岑霄漢間倚天開疊障畫地作重關車向羊腸轉  
人從鳥道還一為苦寒曲淚下推心顏

山行即事

息馬依叢薄寒雲涉淺沙桃源無俗轍雲谷有人家凍壑含朝雨  
晴峯聚晚霞相期白社裏共聽演三車

泛黃河

曾聞星宿海上與月波連西走崑崙坂東流碣石湮魚疑入舟躍  
馬似負圖傳今日臨秋水望洋私自憐

息中山亭子

相傳昔人醉十日酒之地

日日塵沙裏深愁行路難孤亭自超曠過客暫盤桓霜重飄梧葉  
雲輕度石欄不能千日醉幸托一枝安

雨霽約孟有涯中丞遊山孟先出郭追之不及

君宇陰霏斂青林曉霽分山中期共賞野外復離羣即擬追飛蓋  
猶疑隔片雲行行思無限寒葉落繽紛

送焦提學往貴州

書生非法吏猶跨五花驄山祿迎漢使海國被王風俎豆夷酋識  
侏離譯語通爾鄉有名宦好去學文翁

送李推官赴高州

天子念南陲君才况抱奇祗將經節律不以吏為師賈客多踰海  
居人半雜夷雖言持漢法謠俗自須知

送蔣藩幕赴閩中

結束千金劍辛勤萬里遊諸侯門下客才子幕中籌風島鯨波湧  
寒城蜃氣收自公多暇日望海幾登樓

休沐家居簡陳約之

祇役趨東觀校讐良以疲偶乘青簡暇復與白雲期任性形骸豁  
忘機鳥雀知求羊何不至三徑坐相思

送王生歸蜀

明經多不賤嗟子倦遊歸只解攀鱗易何言獻璧非路難裝欲盡  
客久鬢將稀狗監誰相薦成都一布衣

送何學官往金壇

近來稱藝苑大率數江南作師君不忝問俗我能諳家擅靈蛇寶  
人馳白馬談彬彬諸士子莫是出於藍

送陳學官往福寧州

陳生才亦奇年少舉宏詞自信五經笥堪為一卷師衣冠閩俗變  
文字海人知莫即傷淹滯三鱸更不欺

送莫子良擢舉東歸

漢庭方貴少羨爾早翻飛始應公車召旋聞駟馬歸衝星看劍氣  
逼歲換貂衣想到還家日閨中為下機

答陳編修約之柏鄉見寄

菟苑俱將命瓜期獨未歸忽傳千里札坐使寸心違鬢髮行來變

丹楓別後稀時時通遠夢恍是薊門非

送蔣尉赴金華

分野應星躔金華婺女邊微官君勿嘆福地古來傳洞有成羊石

山多釀酒泉即令不好飲猶得學神仙

送程翰林松溪謫居朝陽四首

窈窕玉堂僊漂零瘴海邊煙花違北署鴻雁隔南天水暗疑藏鱷  
峯高欲跼鳶應聞前席召誰道去經年

天連窮髮國地近上雞鄉禁闕心偏遠關河望轉長翻飛看鳳隱

消歇怨蘭芳此路饒荆棘思君欲斷腸

朝陽何所似雲水日氤氳白晝鮫珠落青天蜃閣分山魃迎客旆

海若識人文瀟灑韓祠竹清風令到君

南溟君汎棹北地我驅車忽作分飛鳥深慚比目魚啼猿三下淚

明月兩離居嶺外梅花發逢人早寄書

送孔上公助祭太學歸闕里時賜袞衣一襲



國喜嘉賓至人攀上客行來觀周室禮去入魯王城新袞山龍炫

餘堂金石鳴聖朝稽古意待爾示諸生

春夕皇甫膳部見過索觀鄙作留夜坐

蓬扉春色徧柏葉夜筵開愧乏凌雲賦徒煩結駟來疎鐘出長樂

明月照章臺痛飲須投轄何言興盡回

輓張舍人二首

少小侍中郎人稱張辟疆方隨雞樹息忽是鳳毛亡劍歇雲間氣

珠沈掌上光一經何所託重為相君傷

象賢超世胄服禮並文儒共羨昂霄鶴翻悲過隙駒藏舟人事盡

賜履帝恩孤太息張公子衰榮遂爾殊

汲縣謁比干墓

下馬登丘瓏藜林曲隧通碑因元魏樹地是有周封酒散荒池上

人行秀麥中故宮無可問徒此對松風

中嶽

巫閭控北戶蒼嶺奠西隅茲地陰陽合中天洞壑孤黃樞標正位

紫氣護真圖近接浮丘宅深藏軒后符疏峯連太乙列館象清都

園宮猶漢築馳道尚秦除肅肅泥書祕森森羽蓋趨仙遊微見迹

帝幸暗聞呼露洗千齡柏霜封九節蒲星榆臨砌發月莢應時敷

將訪三山記猶迷七聖途今朝陪廣樂直擬到方壺

游嵩山少林寺

淨域龍巖上香臺鷲嶺邊山由巨靈闢教以法王傳二室圍蘭若

三花接梵筵土中元此地檻外即諸天複岫低衡岱迴軒寫澗瀍

雲衣披雜樹虹影度飛泉綴牖皆青壁綠堤盡白蓮神猿參講幕

馴鴿繞爐煙慧月秋逾徹泥珠夕更鮮谷將鐘迸響潭共鏡爭圓

萬劫終成幻三年併是緣願假金匱力一為照迷川

冬至南郊

明王敦大報泰時禮神君位以南離正宵從甲子分月臨太乙館

星動羽林軍除道疑登岱鳴簫異度汾聲容六變合海嶽百靈紛

五

封檢微題字屏帷悉畫雲神光人共見天語帝親聞盛跡誰能賦  
多慚扈從羣

奉天殿慶成侍宴

饗帝在仁人郊雍景命新友看受釐日卽是賜脯辰警蹕誼黃道  
衣冠集紫宸宰夫稱燕主蕃國備王賓鷓鷯千班序魚龍百伎陳  
鈞天初聽樂玉食共分珍禮厚過三爵恩均洽四隣小臣叨醉飽  
拜舞祝千春

朝謁長陵

赫赫我文皇恢恢廟算長定鼎憑天險因山作地藏三泉疏雁海  
萬壑轉龍荒雲結蒼梧色峯成金粟岡寢園馴象守松柏孝烏翔  
清蹕傳虛谷靈旗隱洞房遺弓仙馭遠上食總帷張臣生良已晚  
幸此拜冠裳

奉命分祀孔廟作

後聖禮先師斯文今在茲將陳百官富詎止一牢祠入室瞻遺器

園橋展盛儀樂堪三月聽奠想兩楹時執鬯元公肅捧璋髦士宜  
鄙儒叨小相端甫奉前規

觀中州進賀長至表箋恭述時寓信陽

子月開周正朝宗協禹方諸神將受紀四海共迎祥望日扳仙仗  
呼嵩繞御林天威臨下國星使人明光彤管書雲物黃鐘獻樂章  
欣逢陽道復願祝帝圖昌

登孫登嘯臺

晉時肥道士長嘯此山陰自遠龍蛇跡能爲鸞鳳音清淨同河上  
沈冥異竹林坐超惟默理妙契守雌心逸駕應難返荒臺尙可臨  
俯看恆衛水遙見太行岑砌冷疎花發屏扇落葉深寧知千載後  
更有阮生尋

銅雀臺二首

玉盃從茲闕銅臺空自寒分香留故愛同輦罷新懽急管銷魂易  
輕絲續命難何因作雲雨彷彿夢中看

漠漠龍髯遠飄飄總帳空自憐妾薄命不得奉君終望幸非前日  
棲靈是舊宮翠襦露薤露錦瑟入松風鸞鏡時猶照蛾眉歲不同  
誰能更歌舞心折望陵中

嵩陽宮柏

嘉樹植崆峒年長勢更雄已無秦帝幸尚有漢皇封榦比孤生竹  
根猶半死桐靈泉玉女灌甘雨嶽神通葉密鶯難度枝樛葛易蒙  
垂陰九華帳弄影五雲宮色掩重巖翠聲含眾竅風賓來虬蓋偃  
仙去鶴巢空非因不材壽春秋自無窮

詠天壇梅花

名卉來南土奇葩曜上方花遲疑避雪葉早爲迎陽靈液滋玄榦  
仙雲拂素裳無言恆斂笑不謝暗飄香夕伴芝房月朝承菟苑霜  
飛窺玉女鏡舞撲羽人觴擬結千年實先呈五出妝帝羹如可和  
持此奉明光

詠蛺蝶花

蜀地羅裁就

蜀有蛺蝶羅

漆園夢始通何言金翅色翻在碧林中未辨

逍遙影爭矜點綴工採香蜂趁侶啄蔬鳥銜蟲易溼緣多粉難飛

詎少風美人笑來撲誤使損芳叢

狂歌行贈孟中丞有涯

我生苦纏縛雅志在泉石不嫌步兵散翻笑中散窄前年奏賦天

北隅頗道君王愛子虛衣冠對日趨香署劍佩通宵過紫衢紫衢

香署千官聚五陵豪氣健如虎鸚鵡何曾慣錦籠爰居元不識鐘

鼓焉能俛首學侏儒局促羞爲轄下駒從古長安誇巧宦張湯爲

智汲黯愚以茲謝病且歸去釣竿遠拂富春樹終日遭逢眼未青

三年塵土衣猶素今日亦何日忽如入鹿門公也襄陽夫子之耳

孫升堂更不問寒溫寫盡肝膈相與論朝看賢隱山暮折申臺柳

坐我白玉筵勸我青荷酒談詩公作指南車對局誰看射雕手君

不見中郎倒屣近王生又不見北海忘年交爾衡相知何必結交

早一言合意千金輕狂歌未斷壺未傾門外驚聞征馬鳴落葉東

還西亂雲縱復橫花開月下儻相憶請公誦我狂歌行

皇陵行

皇陵鬱鬱標淮甸泗上諸峯盡相面衣冠月出鬼前驅劍璽書局  
 人不見銅井沈沈碧砌寒絲霞隱映紅闌干碧砌紅闌松柏裏迢  
 遙復道中天起石馬陰嘶萬歲名雲靈風暗捲長淮水深山大澤  
 兩纏綿白虎朱雀紛後先日精月華相迴旋元氣氤氳幾百年憶  
 昔元朝赤縣裂爭雄逐鹿俱豪傑一朝此地黃龍飛蠅鯨鯢徒  
 濺血已聞帝王自有真更說南陽多貴人戈矛貔虎三千士礪帶  
 河山十八臣江左金陵扶地軸漢家豐沛還湯沐復戶蠲租父老  
 歡重門列戟園陵肅羽騎千屯護玉魚鬣封數仞堆金粟御碑突  
 兀表劬勞百里無人敢樵牧流傳八葉到神孫孝敬先知重本根  
 伏膺蒸嘗時不後清明寒食更澆酒貂綸中使日焚香豸黼詞官  
 夜朝斗新遣撫臣歲祭君不見驪山北邙盡蕪蕪五陵佳氣空模糊壯哉  
 茲陵從古無天長地久垂鴻圖

從軍行送呂兵曹募兵遼海

匈奴十萬入雲中烽火照耀甘泉宮戰士三春不解甲天王一怒  
 欲臨戎追奔盡選流星騎併敵齊分明月弓虜氣憑陵恆候月漢  
 兵超忽若乘風已聞舊戍黃花口復道新屯細柳中飛沙颯沓迷  
 亭障組練繽紛皆北向赤羽朝徵六郡材白茅夜拜五丁將呂郎  
 磊犖似劉生許國從來氣不平匣裏雄韜藏豹變腰閒寶劍作龍  
 鳴敕散黃金收猛士身騎匹馬出長城雁行暗結遼西陣魚貫晴  
 開海上營誓同魯仲能飛箭豈學終軍漫請纓建節行行通大漠  
 檄書馬上時能作瀚海連雲太白高燕然雪照旄頭落知君意氣  
 坐相邀五百神兵集一朝漁陽突騎蛇矛銳幽并俠客鐵驄驕車  
 上磔人常賈勇帳前戲稍屢爭標共道百年胡運息直教一戰虜  
 塵消歸來奏凱獻天子功名絕勝漢班超

送朱建陽

故人三十北上書行到薊門曾棄繻故人今去薊門道雙綬垂腰

一何好道旁桃李爛春晴可憐仙令看花行殷勤斗酒與君別落花片片如飛雪昨歲春花滿前門垂楊陌上始逢君偶然傾蓋輸情素交歡每會披雲霧春來春去能幾時聚散匆匆各自知把袂追攀情未已爲問閩中幾千里武夷之山天下奇翠壁丹崖共蔽虧可但王喬多道氣應傳潘岳有新詩

送陳貢士刺上恩州

陳生磊磊眾所羨十年不遇常彈劍本期談笑取公卿豈意逡巡向州縣憶從小負才華飄飄逸思凌綵霞謝眺詩篇差可擬子雲筆札馬足誇終然獻玉遭雙別安事讀書盈五車揭來奔走長安陌人世紛紛笑落魄高歌白石無誰知用盡黃金徒自惜富貴浮雲不可求且復低眉從薄遊南望桂林雲氣深瘴雨蠻煙多毒淫不辭炎海千重路試取冰壺一片心

滎陽行

滎陽軍壘高嵯峨楚漢之戰何其多已向厥倉奪芻粟還臨鴻水

割山河大小一百一十戰組練崢嶸如閃電存亡呼吸那可知主客縱橫忽然變英姿烈烈紀將軍志不可奪身可焚城西夜半赤帝走獨載黃屋開東門漢家社稷蕭曹力殺身衛主誰能識君不見丹書白馬勒元功吹簫屠狗俱闕國

金臺行

君不見七雄割據勢相均得土者富失土貧燕昭信義明日月不惜千金買駿骨郭卿談笑吐深謀海內賢豪競馳突就中樂生尤絕奇按劍魏朝人豈知一朝遇主同心腹親屈君王爲推轂指麾燕兵百餘萬蹴踏齊城七十六於今六合無并吞寂寞古臺空復存少年未上麒麟閣且學陸沈金馬門

結客少年場行

長安少年膽氣粗生來恥作轅下駒買交不惜千金產使氣能拚七尺軀探丸夜入平陵郭走狗時過渭水隅朱門傾蓋爭言晚白首同心不願餘俠士由來重然諾一言妻子堪相託魯國朱家不

學儒洛陽劇孟偏能博別有王侯勢絕倫  
囊中甲第接天闈蕭朱自倚金貂貴  
班許元稱肺腑親青牛翠隼朝朝合  
錦瑟朱絃夜夜陳門下俱爲驚座客  
堂中皆是報恩人當時顧盼生光彩  
自矜意氣長無改何言榮耀有沈銷  
雲散星分在一朝舊客誰過賣車騎  
新知盡入霍嫖姚始知富貴多親故  
始知貧賤常辛苦他年北闕競彈冠  
今日南山空射虎積薪前後遞相踰  
一死一生交態殊獨有子雲甘寂寞  
閉門白草太玄書

歌風臺

我來擬上歌風臺豈意臺空只平地  
琉璃古井亦崩塌斷碑無字苔蘚翳  
當年此地說豪華富貴歸鄉多意氣  
枌榆社裏列黃麾泗水亭前張赤幟  
里中父老競來窺昔曰劉郎今作帝  
共談疇昔帝一喙季固大言少成事  
椎牛張宴里閭空進錢今日幾萬計  
坐中只帶竹皮冠眾裏長呼武嬭字  
酒酣擊節帝起舞樂極歌殘更流涕  
遊子誰不悲故鄉萬歲吾魂猶樂沛  
賜名此朕湯沐邑世世田

疇免租稅風起雲飛又一時往事蕭條復誰記  
樵人不識斬蛇藪行客還歸貰酒市臺下  
黃河盡日流瞬息人間幾興廢

同院寮觀閣中芍藥作

西掖衡連翡翠城籠煙裊霧百花明  
祇謂紫薇初吐萼忽言紅藥已敷英  
紅藥葳蕤豔盛陽萬年春色在文昌  
寧同鄴下芙蓉苑詎比洛陽桃李塲  
裁成異瓣千般錦結就同心一樣黃  
金閣披時渾是畫綺樓臨處并凝妝  
濯枝故向鳳池上裊露偏依仙掌傍  
仙掌嶙峋對鳳池詞郎侍直鷺鷥齊  
玲瓏玉珮花閒映瓠曳羅衫葉下迷  
花閒葉下情無極含笑含嬌似相識  
羞將雞舌鬪馨香欲取鷄冠並顏色  
翠幕分看態轉新朱闌斜倚不勝春  
未採孤根助靈液聊持芳蕝贈佳人

南苑

秦園盧橘標炎節漢苑蕤荷駐羽旂  
雲氣自依雕輦集星辰故繞畫梁飛  
林行草木皆成隊水戲魚龍各合圍  
更取薰風調曲奏已

看暘谷藉光輝  
午日庭宴

南薰應律轉朱旗  
火帝乘離錦席披  
榴吐千花承羽蓋  
奠開五葉拂瑤墀  
水盤錯出仙人掌  
金縷遙分織女絲  
復道龍舟方競渡  
銜恩共許向昆池

登毘盧閣

高閣迴臨飛鳥上  
丹梯千仞愁攀登  
窗邀佛日金人下  
地逼宸居玉殿層  
一老擊鐘時放梵  
幾人面壁坐傳燈  
同行更說前朝事  
繡蟒銀魚有故僧

遊龍門

龍門業嶽拂雲迴  
鯨浪澎湃動地來  
一片飛泉千仞落  
百重疊嶽五丁開  
水同瀝澗縈天邑  
山接峭函鎖帝臺  
勝概依稀似禹穴  
好奇徒愧馬遷才

龍泉寺對雨

西山爽氣朝來歇  
倏忽玄陰滿四陲  
雲裏樓臺翻借色  
雨中花樹更多姿  
飛虹弄影搖丹嶂  
瀑水分流射綠池  
坐覺禪宮倍幽寂  
憑欄把酒正相宜

永年公館夜宿

棲遲異域南冠客  
嘹唳長風化雁聲  
靜院無朋休對酒  
高樓有女獨鳴箏  
霞光曉伴銀河落  
露氣宵含玉樹清  
古往今來成悵望  
叢臺孤月向人明

龍泉寺懷顧南田使君顧以公事不至復惠酒助看山之興

琳宮窈窕碧峯隈  
歷盡巉巖更上臺  
不見踏花驄馬至  
虛看送酒白衣來  
山中泉石誰相賞  
天末煙雲望屢回  
聞道使君能愛客  
習池還擬接仙杯

詠崔後渠書屋

碧山學士隱牆東  
叢菊蕭蕭卷幔中  
開逕自須同蔣詡  
著書元不愧揚雄  
分畦粳稻清溪注  
對戶峯巒翠靄通  
未許棲遲三畝宅  
還

應密勿五雲宮

題張學士仰宸樓藏賜書

瀛洲別館切清虛詔賜綈出石渠祕典自驚墳索上祥光遙映  
璧奎餘簷前鳥下疑翻字草際螢來爲照書借問鄴侯三萬卷何  
如今日沐恩殊

題張學士陽峯卷

陽山秀色滿南州薜荔叢生楚客遊三峽猿聲偏入夜千巖楓葉  
蚤知秋仙人結宅雲烟近太史藏書洞壑幽便欲焚魚應未得共  
言明主待謨謀

送張學士歸蜀省親

曳履暫違金馬署承歡遙入錦官城欲從狄相雲閒望卻向王陽  
道上行旌轉層峯朝雨色舟迴極浦夜猿聲到家已是初冬候聞  
道林中筍又生

潞河別林汝雨提學浙江

君去會稽何日到諸生湖上待花驄定因立雪知游酢不獨傳經  
似馬融行載圖書邀海月坐移帆舸信江風剡溪見說好山水苦  
欲相從奈轉蓬

送黃參政赴陝右

黃子風流世絕倫翩翩江海謫仙人紫薇開府勞分陝白馬乘春  
遠入秦三輔烟花迎使節五陵豪傑望行塵丈夫得意應如此誰  
笑蹉跎白髮新

送項膳部遷之南行兼呈劉祠部

春流瀾瀾碧波深送遠共如南浦心魏闕幾年叨結綬江臯千里  
惜分襟君遊白下貪雲臥予滯金門笑陸沈郎署故交如問訊邇  
來惟有越人吟

送高行人使琉球

天王玉册頒三殿漢使星槎下百蠻鬼國至今通象貢樓船何處  
度龍關海迷南北惟憑日雲起蓬壺忽見山壯志不愁經歲去安



流應是計程還

送王侍讀赴南都

玉堂學士賦南征躍馬鳴騶出上京奉詔明光新佩印校書天祿  
早知名石頭城下春流滿白鷺洲邊芳草生此去周南異留滯看  
君到處即蓬瀛

送樊大夫會朝長至

中宵緹室吹商管候曉玄堂駕鐵驂天子迎陽疏玉戶羣方獻壽  
拜金函預占黃道卿雲見漸覺朱城淑氣含擬欲從君觀盛典使  
星猶自滯周南

送周雲卿之任通山

湖南此去意何如綠浦清楓萬里餘地僻且看衡岳雁官貧豈食  
武昌魚千家鑿井分江水幾處閑田傍石渠由來撫字惟良牧天  
子他年有賜書

寄周中丞備禦關口

牙旗高建白羊東鼓角殷殷瀚海空雪後錦裘行塞外月明清嘯  
滿樓中幕南五部思歸義薊北諸軍盡立功燕頷書生人共羨一  
朝投筆去平戎

答周約菴中丞九日樂城道中見贈

月卿仗節行燕甸星使乘槎向洛陽傾蓋偶從黃菊候開軒共醉  
紫萸觴樓臺接塞風雲變巖谷迎寒草樹荒戲馬新詞重康樂疎  
才何以答揄揚

送施貢士子羽南行

何用相逢歌莫疑感君落魄不勝悲長鳴自許驂騮並高志寧求  
燕雀知已道羣公能倒屣也應天子幸同時金陵樓閣秋雲裏肅  
肅遙瞻鴻漸儀

送人上陵作

玉園霜露向秋澄節序初臨祀事興恭將圭璧朝羣帝遙奉馨香  
薦五陵祠壇眇眇神光下路寢熒熒燎火升宣室於今敦孝感還

歸早慰聖情凝

覽任少海吏部慶都留題悵然懷人因次其韻

帝京冠蓋同遊日曾忝聲名李杜齊碧樹不堪思遠道綵毫何意  
觀新題書傳劍閣鴻猶阻月滿燕關鵲未棲尊酒論文那更得暮

雲回首雪峯西

贈袁御醫芳洲

家本東南海上村翻因避世向金門熊經自信窺真訣鴻寶還將  
獻至尊鳴佩偶隨供奉侶下簾長對道家言山人不厭少生事種

橘年來滿故園

張相公壽詩

惟中運策九州清共說留侯在漢京賜第近連平樂觀入朝新給  
羽林兵儒生東閣承顏色酋長西蕃識姓名卻望上台多氣象年  
年長傍紫宸明

趙州懷古

千秋霸業消沈盡風俗猶傳趙武靈市上美人揮錦瑟塲中俠客  
舞青萍雁門北去通沙磧鳥道西來入井陘欲向平原訪公子蕭  
蕭賓館戶長扃

呂翁祠堂

呂翁祠堂漳水曲高秋爽氣何氤氳松間隱隱鳴仙樂簷際時時  
駐彩雲浮生一夢誰能度羽客千年不可羣未須白首牽朱紱欲  
向丹丘訪赤文

題劉蕡祠

歲暮江山搖落時客來下馬入荒祠獨傷往事堪流涕欲問遺墟  
不可知璧玉無因終易棄龍鱗有逆竟難披今日登科還我輩對  
君顏厚更何辭

朱仙鎮觀岳將軍廟

丹青畫壁閃旌旂想像勤王轉戰時黃屋未歸南狩駕金牌已罷  
北征師平蕪漠漠前朝隔曠野陰陰暮鳥悲惟有西湖原上樹春

來猶發向南枝

和陳編修約之禁中雪詩二首

建章今日滿清輝朔雪繽紛應候飛忽飄九陌從風散漸積千門  
待日晞素影偏搖宮女扇輕花欲上侍中衣最是相如能獻賦霑  
恩新向苑園歸

鸞靄同雲覆帝畿銀宮玉女特相宜飛花遍入披香苑積絮微消  
太液池三署曉光凝劍佩九門寒色映旌旗亦知聖主揮天藻不  
羨周家黃竹詞

詠夾竹桃

桃竹舊傳生碧海竹桃今見映朱欄春至芬香能共遠秋來花葉  
不同殘疎英灼灼分聚發密蕊菲菲對節攢不信千年將結子錯  
疑竹實待棲鸞

和詠霧中榴花

仙曹飛霧曉氤氳幾樹珍花望不分纖萼蒙茸俱襲錦高枝撩亂

稍披雲初疑葉上緇塵染轉覺叢中淑氣薰爲問江頭歌絳采何  
如玄女裒清芬

九月晦日鈞州公館見菊

天涯已逼三冬候客舍仍開九日花無那繁香經雨歇獨看疎蕊  
向風斜冷英實有騷人興送酒虛疑陶令家想像故園搖落盡倍  
令遊子惜年華

邨居二首

偶然灌園興不是學於陵醉臥松閒月行攀巖下藤睢于竊自愧  
捋闔又無能惟應白社裏談笑共高僧  
山人頗好事蓬戶掩還開四野綠禾滿三秋白雁來授衣裁短褐  
飲蜡獻新醅卽此堪投老栖栖竟何哉

村夜

纖月生西浦流光照北林羣喧一以息百籟相與吟始悟丘園裏  
能生清淨心悠悠何所嘆獨坐撫瑤琴

同皇甫子循遊橫山二首

曲磴行來盡松陰轉寂寥不知茅屋近卻望石梁遙葉響疑聞雨  
渠寒未上潮夫君軒冕客此地欲相招  
常時思獨往坐爲塵事攪幸接金門客相攀桂樹榮峯微片雲度  
谷靜眾禽鳴何年將結社與子共逃名

夜宿王氏莊

微月掛孤壁四山何悄然因穿蘿徑去忽造竹林邊叢木深寒氣  
平蕪淡野烟徘徊興復盡還就茅齋眠

暮春遊陽羨南山四首

清谿知幾曲惟見白雲深一入薜蘿徑欣聞樵採吟春鶯未停囀  
夏葉始繁陰乘此縱長嘯悠然物外心

洞口石縱橫流泉復有聲柴門何處入雞犬自相迎靈草知昏曉  
時禽識雨晴非因罷官久誰得此閒行  
到處暗杉松多言路不通卻從青嶂外轉入綠園中谷口逢茶女

溪邊狎釣童勿嫌疎散甚吾亦是愚公

花落已成蹊村村綠葉齊一園通蝶戲千嶂隔鶯啼澗草多名蕙

山人舊姓嵇窮歡猶未返忽是夕陽西

同林尹遊會真庵

言尋仙子宅窈窕傍清溪望氣行應近穿雲路屢迷人間多戲鹿  
樹老更棲雞願得使君姓留將石上題

游馬跡山宿許道士房有贈二首

獨住水中央言修不死方開簾見白鳥隔院度清香機息何妨弈  
神全可卻糧偶來分半席遽使世情忘

四週環積水信此羽人居鳥下忘機後猿窺搗藥餘閒尋漁父伴  
自註道家書笑我勞生甚逍遙爾不如

題閩泉川副使莊

閩侯貧已甚尙有種瓜田潭巖相映帶農圃與周旋刈秫盡供酒  
賣蔬時得錢躬耕豈不苦所貴無牽纏

謝病贈別高參政子業

逝將歸舊林復此別知音縮魚漸分薄解劍感交深目送三河使  
身分十畝吟從茲一相失長嘆隔飛沈

罷病歸訪王山人含真

一與山翁別年華每自傷還因解龜後重問養雞鄉蘿薜窗中影  
鉛砂枕上方鴻蒙常不語何以答雲將

送王良醫往岷府

獻方曾待詔何事向江干帝側無人薦王門且自安青楓連遠道  
白首寄微官莫惜囊中祕淮南欲合丹

贈王潼谷出守保定

王尊仍出守躍馬上金臺共說股肱郡須憑鎖鑰才雄兵六蕃擁  
天險一關開不爲長城寄誰令高蓋來

贈春巖王尹朝京

赤縣神明宰如君最少年無言似桃李有志笑鷹鷂得暇卽開卷

長貧不受錢此行人共羨名在御屏前

送白尉往湖州

君家太湖北作吏太湖南驛路雞鳴近山城樹影含萬川疏沃野  
百室競春蠶幸此猶吾土微官也自堪

送胡主事推稅荊州

南州饒齒革此去豈徒然言徵山海賦用助水衡錢井邑千金市  
江門百丈船錐刀未可算寬大見君賢

丹陽別干道思三首

久已廢逢迎蕭然世外情因君訪茅屋相送到江城遠岫雪中綠  
寒流冰上行可堪此時別獨自返柴荆

臥病不知久見君三徙官還將鶡冠賤來伴豸衣歡秉燭驚宵曙

同衾屬夜寒平生學禪寂猶自別離難

書生多落魄羨子最逢時繡服官方顯青衿職所司鑄人稱道術  
倚馬見文辭徒抱彈冠意迂疏自可嗤

夏日聽沈君彈琴詩三首

山居足清賞獨恨不能琴偶接青谿客因聽白雪音寒暄乍翻復  
丘壑轉深沈誰道嵇中散風流更可尋  
知君技入神一歇一番新撥處疑非指聲中似有人空山鳴落葉  
暗水躍潛鱗何獨吹簫客能生陰谷春  
忽聽使人驚空山迸一聲能令草樹裏齊作秋蟲鳴暫與松風遠  
還同石磻清曲終人欲散纖月照南楹

贈宜興張醫二首

脩然一逸民山郭往來頻乞藥從貧士傳方自異人草閒收伏菟  
澗畔煮香蕁嘆息市中客誰知百歲身  
生長白雲巖仙書宿所探千金方不惜百草味俱諳採藥行山外  
藏身住市南獨抱文園病逢君試一談

次韻贈陳后岡

昔日京華居同君直玉盧蛾眉寧見妒樗散自知疎佩印紫薇署

垂綸滄海隅爲農吾已矣作吏子何如

送李文與赴河南郡倅任

去謁河南尹期收幕下勳地當分陝處官是古參軍閒就繁臺宴  
晴瞻嵩岳雲諸公誰不愛怒喜定隨君

次韻答張戶部羽卿

自笑如山木何言是國琛一丘幸有托百事已無心敝褐寒增絮  
新詩病懶吟非君重交好誰念碧山深

送董兩峯應舉

小年同硯席惜別自依依此日獻書去何時負弩歸亦知予偃蹇  
不共爾翻飛爲報吾翁道於今戰勝肥

九月八日作

日日閉門坐今朝復如斯窗中見風雨始知重陽期海燕已辭主  
黃花未滿籬余心久委化何用惜良時  
送真州蔣生至宜興親迎歸

相門甥館得才郎文藻翩翩貌復揚十年久著鳴金賦一笑今游  
射雉場江南江北路非遠幾月辭家猶未返他鄉芳草自相留今  
夕佳期未爲晚歸去春洲漲綠濤滿川桃李送蘭橈若使長江作  
天漢應言仙女度星橋

送莆田方生自宜興歸應試

聞君誦詩滿三十年落魄常自惜書生只是數多奇俗子空嘲  
立尚白那能環堵事窮愁乘興飄然賦遠遊荆溪山水清且美屢  
月貪歡猶未休荆溪茂宰君妻弟思君不謂君能至山坳水曲日  
追隨相對渾忘鄉土異君不見荆人別足售良玉好醜由來隨世  
俗期君此去早揚眉一戰能亡三敗辱

送林宜興遷官南部

移家偶愛山中靜地主何煩重相敬吾生恥學茂陵郎如君豈是  
臨卽令誰言陋巷不容車勞君擁蓋常造廬誰言簿書日紛糾勞  
君爲我頻置酒五月清溪暑氣微淹留竹裏共忘歸乍看朝霞初

冒嶺忽驚夕露欲沾衣清才自合翻飛早一朝西上金陵道請君  
別後數寄書山中相識日應少

題東石草堂圖贈黃松江

連山斷若缺一溪百餘折古松三四株爪秃骨半枯聞道閩山乃  
有此誰將輦載來東吳松江太守好靜者迹在風塵心在野苦欲  
還山未得還故託良工爲摹寫太守昔年臥茅荆日日看山無俗  
情醉來向東拜白石誓與此石同死生豈謂金門被羈束復向名  
藩分虎竹橫金衣錦世無比太守只言非所欲乃知碧山不負吾  
駟馬高蓋胡爲乎有時吏散重門閉焚香獨隱烏皮几披圖相對  
一莞然不覺逍遙數峯裏樵人漁子似相識手招兩鶴勢欲起扁  
舟卻在窗戶閒便欲乘虛泛清泚真邪假邪何足問世閒萬事亦  
寄耳

雙壽圖歌爲段翁作

是誰寫此大椿樹爪牙縮張相攫吞輪困偃蹇據絕壁氣凌萬木

皆兒孫似鼻似口挺奇幹半枯半嫩蟠靈根千年神物照魑魅滿  
山精怪爭崩奔樹上懸泉始一線飛灑樹裏成千片匡廬瀑布不  
可尋忽向今朝眼中見立石復似五老峯雲氣模糊露頭面可憐  
此樹與雲石蒼然一色誰能辨石間異草何其多紫芝伏菟森交  
羅仙萱自是百草長緋葩翠葉呈婀娜上承老樹賴嘉蔭亦如松  
柏掛女蘿蕭然相伴歲月晚長養齊霑雨露和吾鄉段翁住東郭  
夫妻七十髻未禿翁家猶子擅丹青手揮絹素爲翁祝一枝一莖  
亦有情五百春秋遞相續請翁披圖應自笑形固可使如槁木

贈王君五十歲

君家城市裏終歲常閉關青松白石滿庭內不許俗人相往還看  
君本是山澤臞年來戰勝身亦肥但道龐公堪自老何須遽瑗更  
知非

題龍圖

世人畫龍得龍皮叔也畫龍得龍髓當其停手凝思時青天颯颯

生風雨卻怪三年不點睛那知一日飛騰去

山莊閒居

身名幸自謝籠樊白首爲農誓不諼慣住山中知鹿性數行樹下  
識禽言巾車每許鄰翁借書帙閒同道士翻醉後漸看松月上滿  
邨雞犬寂無喧

遊神墩寺次壁間韻二首

新雨郊原草木柔葛巾黎杖此尋幽藤垂小徑蟬聲滿苔合荒庭  
鳥跡留隱几翻經聊習靜憑高望遠銷憂相逢更是烟霞客攜  
手同爲汗漫遊

古藤千尺猶自柔布葉垂陰滿院幽楓樹暗隨清磬響山人欲去  
白雲留談立幸有冷霞侶違世已無食肉憂不識老僧蓮社裏可  
容攜酒日來遊

登墩

藜竹裊裊迎風柔古墩掩映清湖幽斷煙白鳥雙洲遠落日青山



半景留耳聽鳴蟬知喚節坐移芳草覺忘憂興來更望華陽頂想見仙人駕鶴遊

廣德道中

蒼山百轉見炊烟茅屋高棲古樹顛細雨薜蘿侵石逕深秋稷稻滿山田雲中望影迷遙岫草裏聞聲覺暗泉倘遇秦人應不識只疑誤入武陵川

泊淮上作

楓林望盡見蒼山桐柏飛流入楚關潮散海門孤島出月明渡口數帆還客夢祇驚青瑣遠滄波長羨白鷗閒聞道長安多桂樹朝來杖策一相攀

淮上五日泛湖同蔣別駕世和

青蘋裊裊漾微風輕舸逍遙暫此同客裏絲蒲驚節換尊中清酒覺愁空一徑荻蘆行不盡數洲魚鳥戲相通向晚前川簫鼓發猶疑風景似江東

聞復官報寄京師友人

姓名不復挂朝參魚鳥由來性所耽篋裏符經都已廢山中藥草漸能諳疎狂自分三宜黜懶病其如七不堪深謝故人推轂意莫將陽羨比終南

代柬寄京中舊遊

莫須彈鋏嘆無魚自愛山東構草廬雨後亂蛙生敝竈秋深落葉伴閒居身隨老圃偏能慣論學潛夫愧不如故人休訝無相訊中散從來懶作書

寄贈曾郎中再入禮部

文昌祕省再光輝傳道仙郎去復歸三署會應尋舊草五時猶得賜新衣官閒常似遊丹壑賦罷多堪獻紫微徒使昔年同宦侶頻於清夜想音徽

家居贈別陳僉事約之

已甘蹤跡滯丘樊蹇逐行麾思欲翻才薄最宜明主棄身貧獨感

故交存蒼苔掩徑誰相過芳草懷人未敢言知君王事方鞅掌不  
記於陵長灌園

臨清十五夜東陳太史約之

行人向月占消息一望雲端百感并南去關山猶未半東升蟾兔  
已先盈乘槎且傍魚龍宿繞樹那堪鳥鵲驚憶與仙郎當此夜幾  
回聯珮侍承明

贈陳僉事約之生日

青春繡服儼神仙早歲爲郎霄漢邊問齒方知散騎後論才已是  
洛陽前官遷柏府多推望經絕韋編不待年衰病無能眞自棄慢  
將犬馬愧君先

崔鎮道中晚望懷陳約之

郊原極目思依依楚水連天楚樹微遠浦潮生人獨往寒林風靜  
鳥雙歸泥塗自覺朋遊好日月偏摧旅鬢稀念爾同爲南竄客烟  
波何事更相違

贈別義興林尹遷官

移家本爲採山薇茂宰風流更可依滿徑蓬蒿頻問訊開尊竹石  
幾忘歸高才豈得淹黃紱野性惟甘臥薜衣今日河梁送君後柴  
關車馬又應稀

次韻贈施道人

御氣曾聞老氏柔寄身偏愛水雲幽道書數卷只自注生計一錢  
常不留賣藥人閒應是謫挂瓢樹下復何憂猶言妻子能相累自  
戴黃冠學遠遊

寄題顧東橋侍郎載酒亭

後世還聞有子雲爲耽寂寞臥江濱門前卽是尋山路座上偏多  
載酒人祿位已非執戟賤文章眞與太玄鄰欲比侯芭應自笑不  
知何日望清塵

送樊醫歸南昌

山人自小愛遊方尙說懷歸意不忘別友因留隔歲藥還家試解

百金裝澄江盡處聞鄉語暮雪深時到草堂願爾常如秋後雁一年好是一來翔

贈張地官督賦江南

皇家財賦重江淮浮濟逾河歲歲來豈謂司農方告匱故煩節使遠相催舳舻接水通千里齒革盈筐備五材民力東南已如此因君一爲獻蘭臺

贈南都莫工部子良夏至齋宿署中

萬乘親郊幸北宮千官齋戒兩都同靈光正想泥封上清夢遙依輦路通烟散玉爐知晝永星分銀燭坐宵中聞君已就汾陰賦猶向周南嘆不逢

送彭府倅進賀聖節表

曾叨執戟侍楓宸猶記呼嵩拜舞辰獻壽頻將金鏡拂入班許覩玉顏眞自憐拙疾辭明主因臥丘園作外臣今日送君何所道祝堯長比華封人

宜興舟中讀徐養齋詩稿因思奉別之久悵然有懷二首

清溪南望五湖連竹樹陰陰兩岸閒桃李孤村春欲盡蒹葭遠水思俱閒散帙曲中驚白雪卷帷天末見青山故鄉共是投簪客猶恨高蹤不可攀

昨歲相逢冰雪深忽看春色獨驚心清風每憶人如玉嘉句堪言字比金四壁荒廬拚自老連洲芳草共誰吟思君坐惜年華暮明月扁舟試一尋

覽徐養齋見懷毛古菴及小子之作存沒感懷和韻

早歲曾陪履杖遊遙思暮木已三秋美人去後空聞笛芳草歸時獨倚樓世上玉顏還見老山中石髓有難求卻慚司馬頻相許擬向清湖共釣舟

和徐養齋移居二首

何年挂卻侍中冠新築山居一畝寬種黍聊爲終歲計移花應待早春看門依綠樹人稀到身謝紅塵夢亦安更是謝家兄弟好長

吟池草對江干

窈窕巖阿叢桂秋清溪一曲草堂幽荒園自向閒中翦靈藥多從  
病裏收葉上題詩應滿樹沙邊載酒不驚鷗莫道東山淹謝傅蒼  
生日夕待嘉謀

題贈施心菊醫士

聞道仙翁昔種菊君今對菊獨淒神蕭條三徑猶含露悵望深秋  
似有人肘後傳方多已試鼎中留藥不嫌貧相從何日東籬下願  
乞餘香慰病身

贈江陰陳君

幽棲選地傍江濱高士風流宿所聞身著薜衣稱隱吏園多橘樹  
比封君琴尊不厭丘中賞魚鳥堪為物外羣怪爾眉閒多道氣年  
來曾讀五千文

寄劉範東提學

不材因得返園廬窮巷猶存四壁餘生計十年思種樹病身終歲

強移書山僧白社容相往長者高車日與疎疇昔虛蒙國士待於  
今榜散更無如

題伯祖平樂守素齋翁像

國史已收循吏名蠻方猶憶使君清祀留桐縣如朱邑文諭南夷  
比陸生公有華夷湘江又見棠花發公嘗令零陵而余父於灘浦  
還聞俎豆成清白傳家自公始高門大燾豈為榮

吾鄉自國初以來中科第為達官者幾何人而以名宦見錄於

國志如平樂公者不數人焉何其難也嗚呼非其誠心愛民潔  
己何以及此今其子孫雖淡泊然清白吏子孫也固有餘榮焉  
使公當時亦與眾同汗其子孫執綺驕侈如他仕宦之家則有

之矣安能垂名皦日如今日也哉此孔子所以致辨於齊景夷  
齊之閒有志者必不以彼易此而吾唐百世子孫所宜鑒也既  
題公祠因志所感於後

和朱子學遷居

辛勤四十有此居生事蕭條只晏如行李隨身一長鋏疎藤挂壁  
數椽廬愧無厚祿堪助汝實有高文能起予獨惜揚雄名位薄世  
人誰識大立書

程副使輓詩

同年舜敷之父

帝里風煙幾度逢此行復與仙郎同傾城冠蓋通家後故國江山  
對酒中老憶舊遊經畫省閒尋芳草到禪宮亦知今日遊魂處多  
在清淮白鷺東

嘉靖丁酉秋余始見公於金陵公留余飲酒自言少時爲太學  
生始遊金陵後官於郎曹居此者十餘年自閒居以來常思雨  
花牛首之勝輒爲之慨然已分此生且休矣今老且病誠不自  
意復能至此每過舊遊處歷歷如昨日事乃知江山長在而人  
命有極牛山之淚可復下乎語畢公掀髯而笑余亦歡飲盡醉  
別去至冬而公卒蓋別公後纔四月也嗟予公而有知尙能復  
來金陵矣乎故余作詩以哀公敘金陵事特詳云

元夕詠冰燈

正憐火樹鬪春妍忽見清輝映夜闌出海蛟珠猶帶水滿堂羅袖  
欲生寒燭花不礙空中影暈氣疑從月裏看爲語東風暫借來  
宵還得盡餘歡

唐荆川先生文集卷之二

詩

庚子歲海印寺再舉同年會紀事四首

伐木張新燕攀鱗憶往時重來散花處更是聚星期玉佩皆鸚侶

金河卽鳳池獨憐邱壑質還復接芳儀

淨院早涼生佳賓四座傾花閒重識面塔裏舊題名對酒憐萍跡

聞歌想鹿鳴十年還此會那得更無情

故遊經繡陌初地入松扉可那看花伴年年漸覺稀一鐘收宿雨

雙樹帶餘暉若問龍池劫誰能不醉歸


梵宮鄰帝苑長此集儒紳檻外諸天界尊前四海人星霜別後鬢

花月向來春且共攄籌策雲臺早致身

得薛君所寄三游紀興刻中有楊方洲見懷之作蓋別去已十餘

年矣撫卷慨然用韻奉答

昔抗萬言疏還歸四壁居誰才應共惜黯黯更無如顧爾猶巖壑



慚予濫石渠聖明思直諫蚤晚下徵書  
送黃翠巖赴松江推官任

君本儒家子新詩更出奇自宜金馬署暫拜爽鳩司海國收魚稻  
桑田賦繭絲南州饒土物勉爾一無私

送沈君守寧波

五馬去趁蹕孤城積水含地收蚶蛤稅人與龍蛇參夷貢珠頻入  
僊書穴可探清貧君已慣海味不須甘

送陸舍人調遼府長史

十載紫薇郎長隨玉輦傍忽辭漢天子去謁諸侯王夢渚陪游獵  
蘭臺佐羽觴子虛今在楚作賦有輝光

送王舍人往崑山為顧相公營墓

明主敦耆老藏山借寵恩使臣出左掖祕器給東園舊路吳中樹  
新碑海上原平津眾賓客試問幾人存

聞石屋彭君置生棺有感為賦四詩

青山結淨因回首跡俱陳司馬四壁宅榮期百歲身文犧幸知免  
行蟻待相親試料還真後誰為倚戶人

隱几嗒然安疑君是鷓冠道書肘後繫人世鏡中看家本無干橘  
生常臥一棺不因茲下淚任爾雍門彈

苦欲辭簪紱歸來掩故園無過六百石只對五千言倚樹看蜩化  
逢人笑舌存老龍且莫去為我發狂論

吾與爾皆夢相看一笑時拘拘亦何惡役役尚如斯藜桂山中約  
枯槎海上期胡為更羈縲有愧故人知

寺中訪後渠崔侍郎不遇次韻

為訪高人館聯鑣出近垌並從金地入不見玉山形榻上畱僊塵  
雲疑隔使星無人問奇字載酒只空亭

濟上別錢副使

木落村逾迥洲迴水更包亂泉春急峽短日漾寒郊問俗非吾土  
逢君似舊交笑談方此始何事又相拋

點蒼山歌贈雪屏趙考功

點蒼山十九峯峯峯巧削玉芙蓉炎天赤日雪不融峯頂湧出十  
九泉一峯一泉相縈纏流到峯前共一川雪花亂落綠波裏疊疊  
連洲鏡中起是爲巨海名西洱蒙舍當年控百蠻山水中閒鑿兩  
關一夫守此百不攀聖代垂裳九夷附此地千秋罷烽戍洱海行  
人日夜渡剪除蓬藿疏街衢歌鐘綺衣盈路隅昔日不毛今雄都  
山中雞犬散不取山下鳥蠻種禾黍况乃儒風似鄒魯紛紛犀象  
走王庭怪石亦具山水形盡輦中州作畫屏羨君結廬山之窟窗  
裏諸峯互出沒夜夜讀書常映雪十年簪笏繫朝班位高官要身  
不閒惟有清夢到故山余亦平生好奇者一說名山心若灑何時  
與君共坐雲峯下

李中麓文選藏書歌

中麓子最好奇平生苦心只自知破塚將尋姬氏籍鑿山欲出禹  
王碑鳥篆蚪文焚後字白雲黃竹刪前詩藏在陰厓及海窟神物

守護誰得窺自從撥取歸君屋但聞胡山鬼夜哭汗牛詎止盈五  
車插架應知滿萬軸開函几席生雲煙五色紛紛耀人目家中綾  
綺割截盡更翦朝衣作裝束中麓子幾歲讀書長閉門自信中郎  
能一目還輕左氏識三墳邇來下筆作詞賦絕似先年石鼓文卻  
憶射策來京國此時才士紛如雲雕龍白馬爭先後一日逢君皆  
閉口試問鮑君已知解對黃雲誰更有共看飛騰邁等倫早排  
閭闔上麒麟遂令紈袴生嘆息公卿元是讀書人老大無聞予自  
憐論交多愧十年前可道壯心猶未已時復從君乞一編

詹府讌集奉和上宰松皋公三首

祥光虹渚應玄蒼喜溢仙曹薦羽觴七鬯萬年徵子聖股肱一德  
見臣良袖攜香霧東華上履曳星辰北斗旁共說疑丞歸大老競

將禮樂贊靈昌

御苑先春萬木蒼宮雲裊裊度瓊觴鸚班並引金貂貴鴻羽全收  
玉署良分日傳經清禁裏罷朝起草紫宸旁恩波忝竊安能報願



祝千秋寶曆昌

玉津晴望鬱蒼蒼環珮初臨試紫觴竝向鳳池開勝會早從麟角  
識元良衣冠迴出商巖上雨露偏承幼海旁自愧承華箴未就謬

將彤管奉明昌

送王翰林浙江兵備副使

同時詞客不如君一劍還將靜海濱雞舌舊從香署吏虎符新領  
伏波軍帆檣萬里輪絞織樓閣三秋吐蜃雲自笑馮郎將白首欲  
從幕下策奇勳

送鄒東郭掌南院

最憐江左風流地暫作周南太史公通籍總稱鸞掖吏分曹獨向  
鳳臺東香攜漢署沾新綬花近秦淮瞰故宮此去談經門下客幾  
人相對坐春風

贈吳山人歸自京師

山人不解機心事早歲藏珍學鹿門住傍巖崖惟四壁賦成金石

幾千言偶遊卿相多懸榻歸去蓬蒿正滿園京洛豈無知己在看  
君終是厭煩喧

贈許太宰

卿家勳貴似諸袁兩世三登八座薄接席貂蟬開甲第成陰桃李  
在公門身延白屋頻推哺官借青宮獨拜恩天子行將問黃髮老  
臣何以贊嘉言

宿雙塔寺林東城羅念菴誤於郭外相尋不遇有作見寄用韻奉

答

謾向金門學隱淪獨遊花院散涼氛諸天只在人間世並馬誰尋  
野外雲白日金輪臨戶映香街笙管隔牆分化城本是迷來路莫  
訝幽人好避羣

次韻贈湯將軍

將軍妙算古人同料敵常如在目中鐵騎連營寒映月樓船跨海  
夜乘風玉門烽火今猶急桂嶺珠璣久未通卻笑封侯應有種看

君百戰立奇功

自述此下系後

祇為抽簪早歸來已四春本非食肉相猶是飯牛身負郭無新業

灌園有舊鄰磯邊獨釣客隴上偶耕人相見一相笑吾今罷問津

宿游塘書懷二首

脈脈常多病雖睡竟寡諧鸞鳩知分量槁木任形骸蟲語喧清夜

藤花媚小齋逃虛何足歎心迹幸無乖

雨過草木好夜來池館清露蟲凝燭影風樹答書聲似瓠甘無用

為羶厭有名且師河上叟毋使慮營營

題陳渡莊

經時不到此花落徧庭蕪開館猶如客憑軒忽喪吾蝶飛看栩栩

鳥喚聽烏鳥便欲題邱壑於今總姓愚

岳亭遇盜次韻

枕書覺已倦挺劍忽相求驚起游仙夢虛疑賈客舟齋糧十日少

載橐一身浮澹泊堪為笑將何謝爾偷

病中試新茶

久不窺園圃多應徧落花生涯只本草歲月又新茶婚嫁身多債

詩書眼尚遮病來都忘却恰似老僧伽

泊舟郭外有感時早災甚

愁多番夜短村郭又雞鳴更聽鄰舟語行看海日生新秋河漢影

竟夕桔櫓聲誰能訟風伯一使甘霖傾

同褚生酒徐生大復夜過城濠水榭作二首

出郭即山家孤亭更水涯人開池上酌蓮吐月中花清籟微微至

明河漸漸斜坐疑塵世隔雞犬亦無譁

祇堪成獨往詎意得同羣柳色秋將近烏啼夜欲分細吟西澗草

遊永慶寺示諸友

村墟正三月春服領春風飛鳥機心外青天佛眼中觀心猶是障

齊物亦非同何處參真訣顏生昔屢空

題金山寺付僧惠傑四首

何處尋龍藏停橈聽梵音中流一塔影遠樹萬家陰僧定潮來去  
月明江淺深試將空水相堪比惠公心  
隱隱帆檣外分明見法幢川光孤斷石井脈割寒江折葦僧歸渡  
觀潮客倚窗一窺龍女揭坐使戰心降  
憑虛聊騁望面面蒹蘆秋坐據三生石心隨萬里流鼉鼉爭出沒  
樓館定沈浮向夕煙氛斂珠光似可求  
法界元無著寥寥空水雲鐘聲潮外住佛相鏡中分經爲魚龍說  
人將鶴鶴羣慈航如可借不厭往來勤  
宿荆溪上塘菴述懷余向曾遊此匆匆十年矣  
園令還多病東方更少徒尋山只獨往到寺卽吾廬酬答慙居士  
衣冠謝鄙儒冥心偶有會木榻小跏趺  
禪樓吾所好來往亦隨緣信宿還今夕支離又十年病身盍禮東

懶性已書捐興到成開口逢人更默然

海上倭方急雲中虜又侵纓冠本非分抱膝復何心樹冷秋前寺

篁齊雨後林此鄉非楚澤濯足亦成吟

委形堪落魄任性絕安排得失浮生夢閒忙造物差平湖疎野樹

微雨寂山齋欲證空王偈猶嫌落幾階

家園只百里幾月不知歸飯合山僧竈眠分漁父磯貌衰非示病

才拙似忘機雖然斷葦酒不惹獨醒譏

山房夜雨歇簷溜響空階叔夜惟貪睡榮越又孰偕廢梳同祝髮

厭肉類持齋轉覺人情隔巖僧卻可儕

登常山山亭次壁閒韻二首

關通百粵會地帶上游雄車馬年年客塵埃滾滾中憂時譏喪狗

逃世托冥鴻出處將誰是徒令懷古風

平生好奇士撫景氣還雄棧度盤蛇際灘行磨蟻中客心南北水

世事去來鴻聞說仙山近冷然欲馭風

過清溪莊值主人不在

岸岸夾叢竹清溪幾許深君從城市隱余向碧山尋翳翳孤村景  
刁刁眾木吟還看題壁字想見閉關心

題清溪莊三首贈顧副使

阮生常避俗平子正歸田種秫供生事為樓伫列仙沙行隨鷺跡  
湖泛趁漁船月下聞高詠應多感興篇

城郭往來久獨憐湖上居素封千樹橘白首一牀書山客秋分蜜

溪忙夜捕魚橫金豈不貴此樂復何如

地即梁鴻宅溪連范蠡湖霜天榮橘柚秋水戲鷗鳧從宦元非巧  
名邱亦是愚欣君遂始願遠屋樹粉榆

答陳澄江僉事村居韻八首

番嫌結社閑獨往築秋場已謝二千石何須八百桑站站夕時鳥  
欣欣雨後秧感時聊一適不是阮生狂

昔歲理人術今朝種樹書大恩番是累非種亦須鋤身老兼栽藥

家貧待畜魚求羊還愧我肯許叩精廬

酒隱君能慣青天白眼寬貌肥占道勝祿去易身安鳥跡攜書對  
藤花倚樹看枋榆非不樂何用羨扶搏

君往愜幽意吾留厭市聲園廬本相接道寂不同情褊心違請謁  
病骨廢耘耕出處兩無著空慚大隱名

城市終當洗開軒向綠疇老知學稼好窮帶著書愁野燕登蠶箔  
山雞雉麥秋村忙無曲調出口自成謳

南國頻饑後滄楚勝酪酥比閭雖麥穗盜賊尚萑蒲闔室供繅繭  
分溝競輓轡田家莫厭苦試看荷戈夫

樗散甘為笑逢迎已覺迷漸能諳豕牧豔復舞雞啼村居鄰北郭  
野語學東齊此是潛夫宅君將為子題

葺屋纔支漏新茅不用添風清田叟鼓雨應社神籤野蔭炎還冷  
村醪酸亦甜高人方對卷曬麥也能兼

贈王山人

自笑久磷緇還眞已是遲偶尋赤松子更結白雲期短褐身將老  
微言世莫知吾生同智北從此問無爲

贈山陰陳千戶病臥毘陵三首陳故毘陵人也

問子來何處云從剡水陰越吟多病客吳語故鄉心尺牘人爭羨  
一言余所欽由來絕絃意今日爲知音

到處能驚巫知君是姓陳小言工作賦大隱不違親倒篋酬寒士  
投書絕貴人吾將從汝去共醉若耶春

高牙將門子何事老蓬蒿坦蕩從吾好浮沈任所遭行窮五岳  
家住一漁舸尚覺雄心在逢人脫寶刀

周蓮渠以詩問病次韻

詩書能作崇齒髮自多愁且效漆園放還同蓮社投樗材非世用  
藥石拙身謀脈脈淹時序空貽知己憂

再疊前韻二首贈蓮渠

十年不入市一飲復何愁祕錄時堪展華簪久已投只有歸田賦

曾無問舍謀營營憐俗子得失盡成憂

字許門生問詩從海上求養眞人伴鶴寄傲屋如舟得喪驚蕉夢  
榮華覺梗浮邑中有蒼舊應使俗回偷

憲副饒湖田見過陳渡草堂賦此爲贈  
皂帽棲遲日掩扉方灌園豈知繡斧客還過雀羅門絲繭東南急

羽書邊徼繁憂時在君輩野老復何言

贈郡倅綱運  
之子從王事秋江曉問津泛舟千里役行篋一官貧淮海雄畿服

瑤琨貢國珍聖明如有問正可繪流民時江南旱甚

送人赴眞定幕

幕下繡鞍來滹沱冰未開服眩稱大郡帷幄選名才雁起分秦塞

贈馮午山提學

吳俗今應變楚材昔共聞試看鑄人術豈尚雕蟲文驄馬迴江樹

絃歌散海雲史書徵德化更是一馮君  
贈吳賓湖

幽棲謝俗客相對只清湖野服裁芳芰時蔬翦綠蒲行吟向漁父  
著論比潛夫前洲雙白鳥識得主人無

題徐君淵泉號

磊磊長髯客人間久避名獨因南澗賞遂與北山盟流處玉琴響  
繞來茅屋清風流堪此地今古一徐生

贈王思東號王君祖爲中舍

以茲百年感東望一歛歛氏族王孫後弓裘世澤餘時攀臯上樹  
獨對齋中書尚說傳奇字知君辨魯魚

贈熊南沙郡倅人賀萬壽節三首

去去朝元使先年漢署郎遙將華封祝再惹御爐香近侍陳鴻寶  
仙人捧御牀試看舊朋輩多在珥貂行

畫省何年別頻驚江上楓因茲萬國會還向五雲宮恩承天語潤

班許近臣同自信真心在羞言藉子公

一朝辭寵辱終歲事沈冥只可羣麋鹿那能出戶庭北胡頻候月

南紀正占星

時秋

長策須君輩將何獻帝庭

壬子陸生南陽褚生滔赴試與之敘別不覺坐至夜分因作二首  
齒長愧一日經傳在兩生攝衣常共席連茹亦同征夜露澄杯氣

秋河澹月明忘言吾已久款款見深情

汨沒嗟來久前儒與後生爭矜腐鼠得誰逐冥鴻征默坐蛩秋語  
窺書螢夜明舊遊看籍湜應悉此時情

常山懷羅念菴

本爲窮幽賞非因避世氛鄉心吳水盡客路粵山分名姓休相問  
漁樵久作羣忽思鸞掖侶日暮倚停雲

壽詩

早謝浮名絆生涯常宴如春來江上棹老去枕中書東郭閒居慣  
南榮世慮疎看君足道貌自與俗人殊

董進齋壽詩

自愛懸車早經今十歲餘薄遊滄海客大隱市城居坐閱人閒世  
時翻肘後書里中問者舊羨爾更誰如

蔡南村壽詩

蔡泰伯里人瀛之父

我識南村叟臞然一逸民卜居三讓里擊壤百年身城府入來少  
桑麻樂處真一經今有子環堵豈嫌貧

壽王生革母

之子門生秀傳經契獨深還因飲冰志更識和丸心貧供江水饌  
詩獻柏舟吟古來推善養尹母復如今

法慕菴六十

禮之父

家世法真餘清名人不如高年推玄字大隱寄塵居逸客閒相過  
機心老更疎多君能教子餘慶在詩書

贈徐學琴六十

改歲周正月推年絳老人山田新刈秫茅屋久藏珍白雪絃中意

青衫物外身贏金亦何羨有子不為貧

題孤山林隱居祠二首

孤山春欲半猶及見梅花笑踟王孫草者尋處士家塵心瑩水鏡

野服映山霞巖壑長如此榮名豈足誇

碧水年年色幽人復此遊不因同所好那得獨相求山鳥矜春語

湖煙淡夕流思君忽自笑信矣一生浮

岳將軍墓二首

國恥猶未雪身危亦自甘九原人不返萬壑氣長寒豈恨藏弓早  
終知借劍難吾身非壯士於此髮衝冠

誰將三字獄墮此萬里城北望真堪淚南枝空自榮國隨身共殞

相與虜俱生落日松風起猶聞劍戟鳴

吳江三忠祠

祠在大湖東畔三忠也

廟枕洞庭波招魂薦楚歌靈風鼠雀避落日鹿麋過東國終為沼  
南兵不渡河江淮形勝地保障近如何

墓檟幾經秋興亡一錫鏤死應爲厲鬼生肯共金酋吳越車書混  
江淮戰伐休幸逢全盛世此地弄扁舟

松關

蓋南雜詩爲吳頤山副使作

月出照松關松陰正滿地恐有山僧歸終夜不須閉

梅塢

王戶

層冰結平川積雪埋高樹無處寄幽情但到梅花塢

筠徑

面面隔深竹茅齋在何處遙聞犬吠聲試從此路去

石丈

自是太古人一身衣百草年年只在山憐爾亦枯槁

蒼翠亭

風來松濤生風去松濤罷雖非參禪客暫此學觀化

會遠樓

層樓對迴溪溪邊草新綠不是傷春人聊騁千里目

元陽洞

混沌遇儵忽誤被鑿一竅寄語談玄人此中可觀妙

小虹橋

采花與汲澗幽事俱在山朝向橋上去暮向橋上還

迎仙館

空齋寂無人草木自森蔚不因羽客遊安得有雲氣

禮星臺

昔在明光宮日侍北斗傍此時臥空谷頻望北斗光

靈芬精舍

山人愛長生辟穀亦云久何以濟朝饑紫芝大如手

山田

從橫亂峯裏忽此見平田不須抱甕汲自有峯頂泉

山池

百泉自奔注更不費疏鑿雨歇天氣清臨池看洗鶴



茅亭

孤亭簇羣岫宴坐增悄然主人何所作多應草太玄

良友軒

里中耆舊多談笑每相聚日暮各自歸此君獨不去

聽鶯閣

春催金谷曉一望百花齊不作遼西夢從渠著意啼

賀陳吏部父母榮贈二首

歲月生涯短詩書世澤長今看墓木拱猶自被恩光

翠鶴裁新服丹沙駐舊容爲問天書寵何如石窰封

已酉八月十八日觀潮作

秋空忽爾色黯黪萬竅怒號山震盪冥冥混沌一氣來游人共指

潮頭上初時映海色尙微及至推山力漸壯瀕洞吳越懼一壑幻

戲人獸驚殊狀滿空煙霧走玉龍萬里川源漚白象雷鼓鞞鞞馮

夷舞日車出沒鮫綃漾海神珍寶不自惜咸與江妃一相餉須臾

漲盡勢稍歇依然宇宙回清亮昔人說此已愈疾何況臨流恣疎

放

賀金翁夫婦雙壽詩翁舉人子韶庠生子聲之父也

金家兄弟早空羣倚馬便作萬言文玉樹輝輝照前後弱冠英名

在人口譽舍同遊愧我先相見每稱吾小友曾說而翁好避諠隱

身西郭如鄉村一生愛誦遠公偈累歲不識縣令門夫婦齊年人

共羨九月開筵對歸雁請看二子接翅飛好將文繡作斑衣

題贈喬僉事兼爲乃翁封君壽

使君昂藏關西客弱冠聲名已籍籍著書每欲準盤誥作賦時能

擲金石爲郎幾歲歷金華還聞建節度喪斜錦水秋霜看避馬杜

陵春草正思家君家住近谷口東而翁亦有子真風游宦勿言親

舍遠金牛元自接秦中

希周兄八十

三十年前事未遙兄時鄉杖我垂髫豈識負劍從長者惟解戲雞

逐馬誇輕躑三十年後事已更驚看鏡裏白髭生問兄何爲卻少壯應是黃金鑄已成

石湖王傅辱觀拙集見贈長句二十三韻奉答一首

少年文苑恣搜集每得異書心喜懌或時一日來東閣輒覺無聊少顏色偶熟草木鳥獸經充貢王庭叨簡迪眉目可醜非世用依然歸來事藿食荒廬四壁豈嫌陋敝帚千金徒自嚇不能屈蠖事深藏尙爾雕蟲餘故習苦思疾書寒燈伴微吟骨立長松側言語能工詫鸚鵡心田耳穢驚狐蜮已知壯夫決不爲况有良朋相羽翼春陵無極只一語此是尼山真血脈汗背幾枉過一生焚棄筆硯甘守黑回頭可笑詎堪覆後生謬謂玄非白祇合篋笥掩瑕垢誰寫竹帛露狂易雲閒長史有古風三江五湖襟期隔下里因風忽傳去幸逢知音寬我責謂余朋舊往復書春蠶頗比他山石百卅餘言拜嘉句坐令枯槁生潤澤夫君清標遠俗姿矯矯忽向我前立轉覺側身感四愁何時開徑延三益東海此日多君子有如

頃篋遞憂擊寄聲林莫兩楊君努力與世埽齷塞

題偶耕書屋送謝右溪西歸兼柬左溪

長君昔挂西曹冠清風漠漠滄江寒少君復謝薇省吏身世飄飄忽如棄歸來對坐四壁居篋中一卷種樹書誰言邱壑足枯槁折腰昔日今何如五月黃梅雨茅屋麥苗滿田蠶上簇童稚欣欣笑相語但免饑寒百事足吳國樗生少好游三仕無成感四休已道栖栖非我事將從沮溺問良謀

題夏中書畫竹

古來畫竹多少人葉葉枝枝輳成幅獨有中書似老文解道胸中有成竹辛苦欲得此君意屢歲清齋斷葷肉偶然興到始一灑萬壑寒聲忽滿屋秋殺春生併一時幾株抽葉幾株秃披紛蛇蠖爭屈伸數寸已覺千尋足中書醉墨滿人閒此幅風神更不俗勸君風雨好收拾葛陂恐與蛟龍逐

卓小仙草書歌

甫守寄我卓仙書北窗閒仁時玩展吳人本慣見龍蛇對此真形  
驚走轉瓊誦東海黃公符蒼古太廟姬王琢曲處素娥歆舞腰勁  
來壯夫縱狼銑藤纏老樹千尺挂鷹攫寒厓百鳥悞已覺人閒出  
草聖卻訝空中墮雲篆古來草書誰擅場酒旭僧素頗中選漏痕  
釵股那足奇脫帽露頂空漫衍雖然奔放不可羈筆墨蹊徑未盡  
遺傳聞卓仙形貌異蓬頭開口足爪跌胸中光怪祕不得漏洩機  
緘在此卷軒轅道士罵俗書寫出靈文世不辨卓仙作字不用手  
唐生識字亦非眼說到手眼兩忘處作者識者俱一筦幾時杖策  
入武夷試問仙郎叩金簡

楊教師鎗歌

老楊自是關東客短衣長軀聚紅面千里隨身丈八矛到處尋人  
鬪輕健謂余儒生頗好武一揖滾滾發雄辨坐驚平地起波濤蠕  
蠕龍蛇手中現撥開雙龍分海嬉攢簇兩蛇合穴戰爭先儘教使  
機關縮退誰知賣破綻目上中眉猶自晒綿中裏鐵那能見滿身

護著不通風百步擯來激流電飛上落下九點丸放去收回一條  
綫問君何爲技至此使我馮軒神眊眩答言少小傳授時五步七  
步畫地踐邇來操弄三十年渾身化作枯樹斵心卻忘手忘鎗  
眼前只見天花旋乃知熟處是通神解牛斫輪安足羨因君亦解  
草書訣君鎗豈讓公孫劍

古鏡歌

羅翰林來自汴西亭王孫寄此

美人昔日開匣時兩面含嬌自矜戲一朝委世拋珠玉獨殉此物  
不忍離埋沒土中幾何年大塊爲工再鑄鑄砂精汞火日夜蒸噴  
作丹朱滿身痣中凝一點秋露珠宿世銅胎盡銷棄有如鍊骨老  
懼仙血肉都捐祇靈氣神物安能久藏匿化作白蜺躍出地銀鏤  
細細髮鬢縈瓜皮津津流水漬山人何處得此寶王孫遠自夷門  
寄良工爲我重開闢一鉤剖出千齡閱初時混沌蟠玄黃倏忽晦  
明分面背清輝逼人心髓寒驚詫蟾蜍墮簷際卻憶朝朝鏡裏人  
已謂衰容止如是今朝覽鏡咄自驚短髮絲絲見凋做溼灰餘色

轉分明皺縠新紋大髣髴雲臺勳業已如夢名山著書安可冀本  
欣始識真面目回首壯心一惟悴照罷還如未照時好醜依然都  
不記

峩嵒道人拳歌

浮屠善幻多技能少林拳法世希有道人更自出新奇乃是深山  
白猿授是日茆堂秋氣高霜薄風微靜枯柳忽然豎髮一頓足崖  
石迸裂驚沙走去來星女擲靈梭天矯天魔翻翠袖訕談含沙鬼  
戲人髮鬣磨牙齧捕獸形人自詫我無形或將跟絰示之肘險中  
呈巧眾盡驚拙裏藏機人莫究漢京尋撞未趨捷海國眩人空抖  
擻番身直指日車停縮首斜鑽鍼眼透百折連腰盡無骨一撒通  
身都是手猶言技癢試賈勇低蹲更作獅子吼興闌顧影卻自惜  
肯使天機俱洩漏餘奇未竟已收場鼻息無聲神氣守道人變化  
固不測跳上蒲團如木偶

日本刀歌

有客贈我日本刀魚鬚作靶青絲縷重重碧海浮渡來身上龍文  
雜藻荇悵然提刀起四顧白日高高天冏冏毛髮凜冽生雞皮坐  
失炎蒸日方永聞道倭夷初鑄成幾歲埋藏擲深井日淘月煉火  
氣盡一片凝冰鬪清冷持此月中斫桂樹顧免應知避光景倭夷  
塗刀用人血至今斑點誰能整精靈長與刀相隨清宵恍見夷鬼  
影邇來韃靼頗驕黠昨夜三關又聞警誰能將此向龍沙奔騰一  
斬單于頸古來神物用有時且向囊中試韜穎

劍井行

時有白氣屬天

僊人擲劍不記年至今光怪猶未歇薄蝕日月騰金晶青天倒挂  
雙白蜺曾斬妖蛟帶腥氣寒泉滿甃誰敢汲只恐仙人求故物但  
看水底飛霹靂

爲謝參政與槐題青白蓮畫

紛紛滿眼盡紅妝忽然見此青白色並挺孤標出倫類豈特中通  
并外直不緣太潔遭染汗自爾天然去雕飾西山餓夫斷煙火南

州高士力稼穡對花疑是此二人良工託物象其德寫貞直欲空  
諸相詎肯輕着一點墨世人只將肉眼看道是紅妝正堪翫金陵  
謝兄善識花每對此花再三歎謝兄卓犖不俗狀已有聲名動藩  
翰願言永保金石心不負此花長作伴

悼僕鈕才

昨日裝書書滿箱恰如鳥盡良工藏日中餘藥正在搗猶似平生  
事未了幻泡本是无常期咄哉一病不週時游塘風冷白楊樹堪  
記年年課租處

遣鶴

乘軒非不貴野性本雲舉側翅窺黃鵠低頭憶紫條水將秋影亂  
月帶夜聲高還逐浮邱子丹臺刷羽毛

紉蘭

汀蘭春可紉采采惜幽芳色映郎官佩香分薜荔裳獨醒知楚客  
欲獻隔江湘不見長安道施資滿意長

釋麋

白鹿蒼山外文身似禍機含慘赴珍苑灑淚別晴磯落葉還驚箭  
雕闌未解圍西巴能活汝去食野田薇

哦松

貞松何鬱鬱春色變寒山且共冰霜潔羞為桃李顏孤懷看晚秀  
佳句落前灣莫是陶元亮一官常閉關

唐荆川先生文集卷之三

詩

病中秋思八首


閒對江楓誦楚騷病容秋色偶相遭  
一身萎蕤同衰葉雙鬢稀疏似毳  
毛衣冠已禿甘牛馬文字終捐是  
粕糟但使盡空諸所有不妨一醉  
笑如陶

宿生葷血病來消掃室焚香意自超  
坐與蜻蜓俱歇午吟隨蟋蟀共鳴  
宵看雲种放終疏散嗜酒揚雄只  
寂寥已覺閉關成僻性公車何處  
欲相招

法宮侍從昔承恩班列貂璫近至尊  
字辨豕魚繙帝典曾校寶筆訓實錄  
迴星漢注詞源獻書開閣三公第  
校射分朋七貴園俟罪江潭今

幾歲清秋回首泰階垣

塞垣萬里事防秋選將分兵出帝州  
白馬幽并遊俠客金兜肺腑冠軍  
侯請纓夙抱迂儒志借筋曾當幃  
幄謀已酉年來堪竊憤翻



翻胡騎入關游

液池梧月冷金沙戶縮天河織女家蘭麝氛氳知賜浴芙蓉撩亂  
覺分花龍舟習戰鏡中曲虎旅傳更馬上笳老去張騫皮骨在秋  
來猶憶舊時槎

學仙曾欲訪王喬中夜頻將一氣調杳杳洞房開禁鑰微微面目  
上清潮色溼灰時人莫識夢鈞天處語難描悵望新秋蒲柳思塵  
緣猶絆鬢先凋

何年海上入妖氛滿地樓臺盡一焚絢露雪霜驚壯士陣翻蛺蝶  
掃疲軍星河避影宵烽逼砧杵停聲巷哭聞野老無能效籌策空  
彈長鈇對秋雲

遠游當日意何如楚越風煙一棹餘湖斬鯨鯢先帝跡山圍龍虎  
異人居閒坐清谿談劍術深探古穴訪仙書試問同行相憶否一  
秋多病閉茅廬

病中秋日作四首

藥裹牽纏歲半徂秋風先自到江湖榮枯草色占鷓鴣深淺潮頭  
候荻蘆吳地連年盡豺虎野人何處覓蓴鱸亦知不是獨醒客與  
世浮沈糟可醕

扁舟繫纜且休徂秋旱川流未灌湖衰齒病多諸品藥貧家薪少  
半圩蘆稍能鄙事催孳豕偶戲仙方看釣鱸自署醉侯常是醉君  
王不待賜恩醕

一身之外不知謀若道謀身病未瘳居並野僧方結夏身隨槁葉  
又經秋肥猶似鬼臞何狀少不如人老合休忽報吳門兵燹盡古  
來佳麗說南州

愚公本自拙於謀僻在煙霞况未瘳蟬響蛩鳴分晝夜寒灰槁木  
混春秋醫方百試增身病藿食終年與世休責守一無聊自慰且  
忘倭寇過蘇州

有感

百步飛刀賊勢雄連城刮地泣途窮誰供秋稅畊農盡將授寒衣

杼柚空星宇仲尼書北斗兵交師曠訝南風六州節制憑元老會  
翦兇渠早奏功

道家人說道中語開口便是先天後天無極太極兵亂中人說  
兵亂中語開口便是干戈搶攘之狀蓋亦各會其所遭也使兵  
亂中人讀道人之詩則雞狗殺戮之憤躍馬除兇之氣便當一  
笑灰冷使道人讀兵亂中人之詩其亦有愀然而攢眉勃然而  
扼腕者耶

陳渡草堂二首

皁衣非復漢庭郎做緼深冬臥草堂貧薄不羞畜牯計沈浮也逐  
鬪雞行殘書閣盡經旬病異味嘗來百草香獨愧頑心猶未化十  
年學道幾亡羊  
近市偏逢食有魚閉門不問出無車牛衣聊自對妻子蜡酒時將  
洽里閭世網幸疏如野馬微名猶在愧山樗亦知農圃真吾事春  
至頻翻種樹書

小樓宴坐二首

不入名山不世閒嗒然隱几置遺編身名瓦礫宜居後人事蚊蚋  
任過前抱樹蛻蟬司化運隔窗風竹發真詮未登道域終難罷微  
管還須學測天

涉世已知入夢蝶居身未作脫鞵鷹自疑戾契終為病欲學墨屎  
又不能金老相逢知法器慈公頗訝似禪僧牛乎馬也從人喚惟  
一迂儒是本稱

嘉興金道士三十年不下牀亦三十年不開口冬夏一絮被自  
擁余叩之以指畫卓許余入道慈舟者蘇之名僧也余見之不  
告以姓名渠深歎異以余為頭陀相也

又疊前韻二首

到處迷陽不記年村中曆本逐時編寒鳥滿野成禾後社燕辭人  
落木前戒酒劉伶終酒性遣言摩詰亦言詮青天自是無逃處何  
事靈均更問天



混合高低齊鷓鳳經過老少變鳩鷹屈伸禽戲憑何訣篆刻蟲雕  
誤謂能盡日閉關非酒聖廿年猜謎是番僧余與翠峯僧往此身  
來酬對者廿年  
本自無劬兩月旦先生若麼稱

莊中作

帶郭頃田屋一尋歸畊自許力能任浮沈袁盎嗤驅狗廉後王陽  
訝化金貯麥舊庾將易穀行鞭新竹漸成林計然七策皆無用小  
試經綸底似今

自述

避人不敢厭高深逃影何如學息陰楚客又成蕉鹿夢漆園未了  
是非心紛紛世事看花發默默天機聽鳥吟可笑維摩真病在無  
言說處是金鍼

有相士謂余四十六歲且死者詩以自笑古人云死生亦大矣此  
謂趁日力以進道者言之也苟不進道總是虛生修短何辨焉  
苟於道有見處夕死可矣然則死生詎足爲大哉

本是癯然山澤士衰年況自不勝衣色常帶墨緣辭肉形或如灰  
似杜機睢于久謝偕來眾蹇拙何心知我希世人莫詫方皋眼相  
馬由來失瘦肥

殤子彭聃誰天壽百骸九竅孰疏親若過顏氏十四歲便了王孫  
一裸身三載濫叨金馬客幾人共坐絳紗春卽今已似前生事何  
待他年跡始陳

人情世事古猶今寂寞空林寄此心賢聖不分聊中酒虧成忘盡  
一開琴有書終日只掩卷無病長年亦擁衿卽使癯然似桑戶未  
逢點也是知音

學道曾窺天壤意寒儒又是膝孿人只言蔡澤有限壽誰見壺邱  
不定身貴客懶迎長謝病薄田可飽敢稱貧後來不用問修短已  
占溪山四十春

囊癰臥病作三首

節候經春日日陰寒衿獨擁閉門深終朝鍊液非仙氣幾歲懸疣

是雨淫焦火凝冰鐫瘦骨兒癡女長試灰心總緣病裏悲歌意不為離鄉也越吟

春牛忽驚狗馬疾年來似是龍蛇辰謝醫少錢長卻藥煖骨累衲

聊借人味為補虛一試肉事求如意屢生嗔正愁未了形骸外生

老病苦只此身余平生無厚褥止一褥既薄且微病骨覺冷硬不

戒肉養病乃肉食頻年喪我几堪隱到處逢人席任爭疣贅勿嫌能侈性支離番笑

足全生野蔬入口勝甘脆病骨先時下雨晴苦訝道人長好懶如

今懶病果相成涇人病骨覺爽然則晴

瘡病作覺痛楚則陰雨至矣

跣躄柳肘盡欣然深隱烏皮也自便金冶由他不由我狠胡是病

亦是天身先辭宦猶中熱衣未經秋已著絲炎涼反覆須臾事一

疾番令悟世緣

小集為人所刻

文學從來本不長隱居辭說半猖狂徒令後世能疑孟祗覺前身似姓莊玄白何分終覆瓿穀臧奚事總亡羊從今已息談天口只著農桑一兩章

靈芝寺同童元功宴坐

潮上高樓縱遠心復沿湖岸過東林身閒似帶煙霞氣地冷兼無

鐘磬音衣裏寶珠應自信苑中靈草試相尋坐來忽散千峯雪對

爾無言意轉深

登屠翰林仍臺作二首

太史仙臺多勝概正臨樵李古城東五色雲生知海近四圍山遠

覺天空閒居作賦青春後幾歲鳴弦明月中不是掖垣同宦侶閉

關那許得相逢

一上高臺興不孤望中總總入虛無煙霏春變陰晴氣草樹天輸

海岳圖對酒笑將花是伴銷憂誰問土非吾知君苦厭文園臥此

地能令肺病蘇時屠久臥疾

次人憂旱作

歲歲吳儂事水耕朝朝占雨愁雲輕澤中不聞鳩語合田際但見  
龜文生野老舐糠猶自得書生炊桂亦何情東南生計已如此聞  
道山西又點兵

再遊清溪莊值主人不在次韻

桃樹臨溪思不禁扁舟重問草堂陰西湖水落鼃鼃石南國霜清  
橘柚林壟際流泉宜稻性窗前過鹿解人心憶君翦徑相迎處今  
日蓬蒿又已侵

至常熟陳中丞白訓導邀登福山看海二首

春早湖山雨半晴有客邀我觀滄瀛澤國冥冥蒸海氣石灘淺淺  
鬪江聲日月迴旋一島小金銀色相十洲明微風向夕送清響應  
是仙人吹玉笙

久緣迫隘悲時俗海嶠春臨思若何地湧龍蛇爭起陸天投星斗  
橫翻波封疆坐覺華夷并氣候常看霧雨多才謝枚生能作賦觀

潮恰對曲江阿

金澤寺中寄松江友人

澄湖昨夜雨初霽驟覺春衫寒意多遠浦草青送歸雁夕陽潮上  
生微波戲窺佛偈翻金字靜臥巖扉掩綠蘿伊人只在蒹葭外獨  
對清尊奈爾何

松江金澤寺四首

東南巨浸五湖深古寺維舟正夕陰客到山僧罷清磬雀誼晴日  
下高林夾洲煙火三家市滿目蒹葭萬里心徙倚不知餘興盡月  
明還擬聽龍吟

三江抱處勢如環野客探奇住不還一望樓臺疑海上稍聞雞犬  
覺人閒幸無漁父知名姓且與山僧共閉關自笑歸來張季子春  
時蓴葉未堪攀

何年此地開金刹宋代流傳直到今聽法石將山作幻護經龍與  
水增深爐煙裊裊知塵性柏樹青青見佛心可是攀緣渾未盡天

花猶自惹衣襟

水國餘寒芳草稀  
偶隨煙艇問山扉  
窗中怪石如人立  
天際孤帆伴鳥飛  
高齋盡日逢僧語  
短褐經春換客衣  
吳江亦是垂綸地  
笑指星文愧少微

天寧寺產外樓四首

瞰郭樓臺誰共登  
偶攜仙客對山僧  
林煙渺渺人家盡  
階日微微花氣蒸  
浮世閒看飛鳥過  
機心不遣白猿騰  
平生自笑支離甚  
散髮行歌此又曾

名山不用遠攀登  
暫借繩牀我亦僧  
幾樹鳴禽助禪寂  
一叢修竹散炎蒸  
捻花不盡心傳妙  
對塔空將口說騰  
俛仰百年成滾滾  
乾坤隻眼更誰曾

金門十載笑重登  
歸去仍依白社僧  
虛館靜聽宵蟻戰  
遠山時見夏雲蒸  
已甘散櫟終年計  
恥逐冥鴻萬里騰  
爲問洛城冠蓋侶  
鬢毛銷盡得閒曾

閒裏香臺盡日登  
嘿然一笑又逢僧  
衣裁野薜緇塵淨  
飯試山精石鼎蒸  
大士西方談寶相  
僊人東海說飛騰  
人間多少亡羊路  
一行來也未曾

題湖上廢寺二首

禪宮舊枕清湖曲  
與客尋幽試共登  
獨樹春深初著蘂  
空山行徧不逢僧  
臺荒曾與施烏食  
城化徒聞駐鹿乘  
惟有松房明月影  
年年長似爲然燈

古寺無人盡日開  
陰廊寂寂長莓苔  
何年飛錫老僧去  
此度折梅狂客來  
迸水乍如聞梵樂  
疏松猶自繞香臺  
人間俛仰成今古  
何必昆明有劫灰

題龍池菴三首相傳伏虎禪  
僧開山處山頂有龍井  
蜥蜴見則雨遠遊爲訪白雲巖  
轉盡孤峯路更南  
龍見小身時出井  
虎馴大士舊開庵  
禪心客思俱潭水  
古佛寒松共石龕  
坐對老僧無一事  
夜深相與說楞嚴

精廬原寄北山巖新築高齋過嶺南谷窈窕閒還密樹石孤危處  
更虛菴聽經野鹿頻窺戶宴坐山僧不出龕客欲逃禪無可醉遠  
公於酒禁方嚴

霽後嵐光散曉巖望中佳麗盡東南三春蘭蕙堪成畹千里湖山  
併在菴馴鴿下時呈佛性飛鷹宿處見僧龕維摩今日還多病酬  
答誰將究妙嚴

贈菴中老僧僧解相人術少嘗游歷江南晚歸菴中

蚤從祝髮事棲巖爲禮名師每向南業淨六根成慧眼身無一物  
寄菴菴樹邊引澗盥須汲松下翻經幾到龕若使焚香能證道前  
身應說是香嚴

嘉靖丁未春余以病客荆溪遂同杭子宣登龍池僧居嵌巖中  
如鳥巢梯其門以登值二老僧相對煨笋遂以笋供余二人因  
留宿與老僧坐至夜分談說楞嚴因緣事老僧意甚朴野可愛  
明日曉起嵐氣滿山乾坤如混沌狀階前竹柏亦在摩盪中咫

尺不可物色日且午始開霽則諸峯歷歷澄湖隱映樓觀草樹  
百里之外若在几前蓋宇宙閒晦明不常若此旣午出往石屑  
石屑兩山夾澗山高百餘仞而澗道僅闊四五十步人家緣澗  
以居惟亭午則見日色蓋其勝又與龍池異觀矣旣午飯遂從  
西霞步入舟意興悠然如有得也嗚呼此豈可與沈酣聲利者  
道哉遂書以貽子宣使藏之

遊宜興海會寺作

逕路緣溪不知遠忽然身已入峯腰深山怪石如懷寶暗谷懸泉  
訝聽潮僧比封君千頃竹人稀農畝萬家樵遠公不厭疏狂客試  
結茅廬共寂寥

贈黃子晦故黃教授子

覺舍相逢憶聚星予慚入室爾趨庭子長能繼先人業王吉曾承  
博士經萬里風煙還命駕廿年蹤跡已如萍衰顏重感青衿日一  
笑尊前喜媿并

寄周臺官二首

時余將往南都

南臺分署沐恩初，官是疇人世業餘。龍吐珠璣天地轉，星塗黃赤石甘書。秦階平處瞻雲闕，玉漏清時直禁廬。應有道人叩關者，試看紫氣近何如。

太史元隨供奉閒，南都祕省更清嚴。沙書暗譯西蕃曆，草奏多陳南極占。日下有雲朝紀瑞，臺中無事晝垂簾。倘覩少微思處士，漁樵已判此生淹。

家居喜袁芳洲相過賦此為贈三首

相逢京國最情深，休沐歸來每共尋。異品對飡呈海味，道衣便坐解朝簪。迂疎北闕上書日，寂寞江潭俟罪心。已分與君成契闊，一杯還此幸同斟。

憶昔曾同念菴子，歲寒訪汝深雪邊。別開閒館屏人語，不解朝衣藉草眠。琴意相傳中散後，玄言每到漆園前。正是江東暮雲處，再逢攜手一悽然。

四十支離一老夫，衰顏恰比列仙臞。鑄金不驗身多病，種樹無能圃半蕪。長日閉關聊嘿嘿，短衣迎客笑拘拘。知君昔日探玄意，定有真詮肯示予。

次韻贈薛仲常

山林鐘鼎性俱安，官舍寧非在澗槃。此日心情真似水，平生臭味本如蘭。閱世方舉誰叱咤，認真桑戶且衣冠。祇應黃馬泰泉溪田頻來往，春日江楓共倚闌。

歲暮有懷諸子

歲暮蕭條只自如，南州高士久無書。達樗材在野大何用，種髮經年短不梳。剡水驚心溪雪後，汝隴山飛夢嶺梅初。景祠郎消息憑誰問，萬里昆明是謫居。仁叔

贈張贛州致仕還吳次達夫韻

田園舊在海東頭，海上新歸張翰舟。種菊不辭三徑晚，采蓴將及五湖秋。人情歷盡惟看弈，世事忘來獨好樓。賸有著書心尚在，知

君原不為窮愁

贈宜興王丞次韻王蒲州人

官粟還能五斗無年來只是憶樵漁道知戰勝臞猶在詩為身窮思獨殊耕稼吾非徐孺子才華爾亦阮元瑜他年更向龍門隱為

念江皋一腐儒

答朱刑部士南見寄

清齋偃息灌園餘轉盡春禽又夏初對客不須妨蠟屐占年常自檢囊書六經注腳吾焉敢五岳行蹤或可如宣室正須公等在野人只合掩荒廬

同萬鹿園宿工文菴次韻有贈

何處尋山不厭深淡煙歸鳥暮鐘音去家百里訝如客別爾經年尚此心宴坐清香滋夜氣閉門殘雪映寒林相從一宿應堪覺機事何須問漢陰

次葉師與諸生講書鐘樓寺聞鐘作

早歲傳經髮已斑寄身精舍渺人寰苔邊屢跡堪盈戶花外鐘聲正掩關驟覺海潮生靜夜卻隨仙梵響空山先生嘿嘿隱几坐試問諸生醒夢間

養病道院忽張君見訪不值奉寄

生涯歲歲藥囊間已息交游亦未閒土木形骸真覺槁蓬蒿庭院只常關偶隨道侶學禽戲忽枉高人題鳳還此夕知君向何處多應弄月臥江灣

答贈胡柏泉

赤囊前日奏邊書阜帽何時掩故廬鳴劍豈知孤憤切請纓爭笑少年疎自甘淡泊看松菊恥學浮沈逐里閭春日黃鸝西澗草憶君歸去灌園初

送郭無錫擢南曹主事

郭侯齊魯推名士暫屈清才縮縣符折獄一言驚老吏洗心終歲比冰壺南曹已應郎官宿東國常懷仙令臆野老殷勤何以贈益

崇明德永嘉譽

贈督府張半洲兼東周中丞石崖四首

威名昔日動南荒斧鉞重分定海疆八鎮大臣承節制六千君子備戎行若營內險無如海但練沙兵略用狼師老寇深為日久仁

看石畫

更張

壯猷元老舊文儒羽戚雍容禮樂餘吳起援枹休進劍韋卿對壘只肩輿撫士嚴冬挾重纊屏人半夜草陰符復道降人為我用三

吳深雪正擒俘

無知□□恣魚虓誰識元戎廟略饒七策謀臣陪後乘三標蠻騎護前茅計藏處女深堅壁勢激驚雷迅擣巢民夷連結禍未已上

計由來是伐交

插羽飛書入建章帝親推轂任才良東南大略輸公瑾尊俎奇謀仗子房人家半是焚燒後禾黍又成荆棘場為將先須固根本諸公深計在民瘡

尹洞山祭酒枉顧草堂有作見贈次韻二首

相思幾度夢中迷卻望金門隔石谿騏驎合馳千里足鷓鴣分老

一枝棲門纔通水勞移棹篋尚藏書借照藜更羨君如遠祖喜談

玄一派自關西

獨持鳴鐸啓羣昏南北諸儒盡在門身繫蒼生人望久道行世子國師尊過憂治世常如病冥契真詮不着言別後知公心事在每占箕斗坐孤村

又疊二首

感時愁見海氛迷抱拙空知臥一谿秋盡龍蛇還起陸月明烏鵲

正驚棲儒冠本不閑軍旅肉食誰能念藿藜對子杞憂方一寫明

朝車馬又東西

檇散無能任醉昏蕭然帶索掩衡門荒庭久已無綦履上客何期共酒尊籌國賴君三寸舌著書強我五千言擁衾相對渾忘寢弦月微微上遠村



贈都督萬鹿園四首次思節韻

幾年枯寂學全真一握兵機運鬼神驕養義兒皆判死灰心禪客亦投身獨承利鏃生如賸徧散黃金家益貧直欲填橋跨滄海先聲萬里走波臣

暫脫荷衣事鼓鼙從軍亦復有新詩犯難甘為智士笑還山肯顧道人期中胥自信知天定李廣何心計數奇尊俎運籌今已就潢池跳躍欲奚為

許國誰能似爾真每憂時變幾傷神試看養亂偷生將共是腰金拖玉身杼軸千家愁命盡轉輸萬里歎師貧饑饉干戈今並急謀全仰二三臣

寒宵清嘯雜征鼙撫劍劉琨本善詩開幕待降收死力隔江遣謀刻還期功須因敗番成巧算恰當機不見奇長子帥師今在爾道傍築室莫輕為

詠俞虛江參將四首

將軍意氣賈無倫感激靈辭血戰頻手搏鬼夷嘗百種身懸鯨海歷三春掃空巢穴多深夜奪得鯨鯢祇數人此日渠魁當授首策勳早見上麒麟

知君兵計原儒術儒術深明計轉工洞識天符非候氣妙窮火力不因風巨魚射處波神遁雄劍鳴時水怪空卻笑賊徒能負險幾人關闔劫版中

昔破交夷尙少年祕經曾自白猿傳一軍盡署滄溟裏百戰常居士卒先龍為求羣窺劍匣蜃因吐氣護樓船尋常嚙齒非無為不盪□□誓不旋

絕島諸蠻次第芟中宵蓐食理征衫船通木井三年水檣轉銅烏萬里帆軍斗稀鳴人莫犯身衣常解士爭銜功成他日誰能頌海上磨厓大字嵌

送曹子泰自大理出守漳郡  
兵戈南徼方多事佩印特煩良牧來于公治獄元無枉孟綽持廉

也有才山稅積荒勞撫字海毗負險費招徠要使經營收異績未  
宜拘譏按常裁

萬思節以集中無名作詩見貽二首

學道頻年慕屢空支離猶墜語言中不是班生表人物徒然揚子  
戲雕蟲書字書名吾豈敢得皮得髓子應同他年郊時傳中說倘  
借名卿孰過公

舉比三載愧儀刑學術那堪立戶庭顧我自知太玄白知君本是  
出藍青老去門徒多謝遣病來意緒轉沈冥高賢豈訝無名籍十  
哲由來是俗稱

萬思節工於詩而近又學射次韻答之

衣鉢寂寥吾且老文章鍛鍊子能工一源已謂出天稷六義還須  
繼國風深窮別趣元闕理力造奇言不露鋒便是詩家射雕手何  
須射藝又兼通

次萬思節韻送蕭芝田二首

屠龍老已知無用一遇時艱見術精粹就戈矛皆吐火幻成獅象  
總疑兵空中墮語人無跡地底藏雷賊不驚戰勝何須邀重賞由  
來只欲賭聲名

共說火攻為上策祕方誰復似君能石飛陡使晴鳴電機轉真疑  
夏造冰魯國雲梯猶自拙楚人燧象未須驚么麼倭鬼那堪算破  
虜橫行記昔曾

題王世新一枝窩二首

蕭然環堵傍湖坳半瓦參差半覆茅鐘鼎相傳精古字戶庭不出  
玩初文紛華燕雀窺金屋空曠鷓鴣占海郊榮寂兩忘非所事一  
枝聊爾寄吾巢

自笑名場久脫羈敝廬歲歲理新茨試看繞樹空三匝何似巢林  
寄一枝閒行蓬蘞孤飛處晏坐榆枋斂翼時寂寞漆園千載後心  
期應只許君知

希世從來謝不能虛聞每與道心增交游息處孤松對今昔忘來

一几憑夜讀陰符羞說劍醉過白社偶同僧如君自以鷓鴣比借  
問何人是大鵬

夜歸陳渡草堂時新與諸子別去有懷一首

野夫也復到城市日暮還尋四壁廬蛩響露餘將入戶人歸月裏  
又離居坐憑烏几都忘我起對流螢且廢書正憶青衿同舍子別  
來秋興各何如

自擬身名如鄭圃官環半畝日長局褐衣頗笑非懷玉茆屋何因  
卻聚星樹底蟬聲希鼓瑟燈前鳥字一談經試言吾易將東去未  
識何人是姓丁

癸卯送仲弟正之赴試

偶因今日送行處尚憶當年聽鹿鳴馬氏白眉占仲子吳門霜鬢  
愧難兄秋來一雁寒江影天外三山古帝城此去騫騰非所羨期  
無溫飽負平生  
己酉送兩弟正之立之赴試

秋水芙蓉映綠衫殷勤送爾到江潭人能鳴世慙三鳳家有遺經  
是二南文入妙來無過熟書從疑處更須參遠遊他日看之子下  
澤款段吾已堪

送諸從遊應試二首

一壑謀身世所疎幾人相伴此閒居月懸山館談經處雪壓林皋  
宴坐餘向來衣鉢吾將付先輩文章子孰如亦知雅志輕青紫好  
及明時早上書

幾年山澤共淹留今日公車且見求楊柳扁舟吳苑夕梧桐雙闕  
漢京秋清時元不棄寒士白璧誰將笑暗投都下逢人說論語莫  
言師授是張侯

送馮子聲赴試

與君硯席辱周旋義理蠶絲每共研穎悟最居德祖後聲名愧出  
照鄰前身同槁木甘吾隱賦就凌雲羨爾賢莫道孫弘曾不遇漢  
庭推轂在茲年

送褚生滔赴試

久撒皋比絕來往褚生時復款柴門  
文有波瀾堪得髓座無笙管只清言  
客心落葉秋江繞別思平蕪夕鳥翻  
此去期君戰勝後歸來正對菊花尊

鄱陽別方道人

戶庭不出已多年千里隨君意豁然  
飲醉或歌還或泣鬢蓬疑鬼又疑仙  
詎知衰鳳堪為笑且學塗龜得自全  
今日別離何足恨終期共住白雲巔

中秋夜同陳澄江張夢麟城濠泛月

森爽秋逢三五中霜天雲物坐來空  
河灌百川還小艇寺藏荒野亦疏鐘  
客嘯忽聞清唳雁月圓真訝吐珠龍  
疑君與我皆仙骨身世何須更挂胸

和張尚書甬川新修池亭奉母登憩作

聖朝耆舊位登三綵服公餘樂更堪  
東洛撫師雙玉節西園奉母

一茅菴春暉映處花侵戶冬筍成時竹上簷  
聞道閒居新作賦承歡養性此能兼

贈蔣璞山封君

主事宗魯之父

早游鄉校已知名曾與賓興聽鹿鳴  
修行明經為博士夏弦春誦課諸生  
官無鼎食千鍾願老有鄉園十畝情  
更笑贏金何所用儂郎作吏比冰清

贈張通政

五湖舟楫是家居篋裏惟攜老氏書  
幾日陸沈門下省一生心跡海東漁  
賓常滿座嫌猶少行不齎糧任所如  
陽羨山靈相望久獨能無意命巾車

用韻自述

南村北郭任吾居懶散何心更著書  
小酌或能稱酒隱直鉤聊復事溪漁  
童時篆刻堪為笑病後形骸漸不如  
若道猖狂今又甚窮途猶自未迴車

壽張通政

蚤耽玄寂謝塵氛身隱猶嫌名可聞自著道衣辭漢闕因尋仙錄  
禮茅君行隨勝跡曾無住藏向名山更有文南國夜來占氣色少  
微渺渺動江雲

壽陸師懷齋七十

廿年不向城市行閒看桑麻自長成道貌肥來知戰勝儒冠挂後  
覺身輕北窗意味人千古西序聲名子一經髻鬣門生今白首稱  
觴還聽後堂笙

曹霜崖六十

曹生恬之父  
舊官御史

道人容色自矍然幾歲江皋躡紫煙謝氏家兒如玉樹周時柱史  
是神仙鼎成靈藥方皆驗書貯名山世未傳懶散自憐蒲柳質相  
從擬欲學長年

司訓殷龍巖壽詩

文東之父

白頭博士早懸車鳩杖扶身八十餘甲子暗占絳老歲今文口授

伏生書清尊只許通門客隱几何心出里間應笑贏金無所用仙  
郎才藻更誰如

楊醫士六十

衣裁鶴氅鵠為冠數卷方書一草菴絳縣老人知幾歲太倉仙令  
卻多男不為避人居郭外每因采藥到山南年來頗訝嬰兒色道  
術從知宿所探

褚怡閒六十

涪之

古來仙客說長髯今日髯翁亦是仙家近縣門不識令身居城郭  
亦耕田鳩形正可供扶杖亥字還看紀歲年共羨高門將有待賢  
郎文藻更翩翩

贈宜興閔翁八十壽詩

上舍級

古貌翛然山澤矍力田還是漢人餘久諳汜勝齊民術閒讀周倅  
風土書桑榆曖曖隨行徑弟子訢訢與燕居駟馬從來足憂患羨  
君身世更何如

贈天寧寺僧八十

化城東畔駐三乘祝髮從師記昔曾  
頻著袈裟迎上客自分齋飯  
與遊僧談經幾夜窗飛雨削杖先  
年手種藤因笑馬鳴身已老欲  
憑弟子為傳燈

懷竹叔壽詩叔善畫傳自乃翁

門傍清溪長自扁陰藜竹繞幽庭地  
偏南郭人堪隱秋盡東籬  
菊正馨笑傲百年惟稼圃風流兩世  
擅丹青不須海上求靈藥元  
是江邊老歲星

楊醫士壽詩

東亭先生富道術隱居城郭似江湖  
隨身長挾雙白鹿入市只懸  
一玉壺社中漸覺推前輩門外從教  
滿病夫予亦文園高臥客年  
來肺氣為君蘇  
贈丹陽湯孺人壽詩

少年為婦舅姑前及見黃門正拜官  
喬木門前經幾世曾孫膝下

且勝冠中厨列鼎堪調膳永夜真心憶和丸  
聞道仙郎拜嘉慶沾  
恩新自五雲端

謁文敏楊太師墓次江提學韻

野狐三度扈王師諸將從公授指麾賜解御裘冬  
覺煖詔裁密旨  
夜常隨前籌不數貔貅力末命仍歸喉舌司  
萬里回鑿驚駕晏軍  
中未有一人知

北郭謁宋鄒道鄉文忠公墓

宋代已經三易世忠公遺墓尚嶙峋敢言有志成  
慈母公母張欲公為諫官  
報逮罪何期及故人公諱故友王田黃閣十年終賣主瘴烟萬里  
合投身已分此生堪客死魂歸猶是故鄉春

讀東坡詩戲作東坡卒於武進顧橋去余家數十步

公詩句句寓胸臆一滴冰成大海翻方舉  
牝牡無定相曼倩滑稽  
有至言掃除李杜芻狗語出入鬼神傀儡門  
異代或疑後身在告  
終此地招其魂

喇嘛翠峰老僧輓詩三首

枯木寒巖亦未真走盤珠子自精神三飡煮斡一生事翠峰每履

歲齋僧幾萬人鑄冶金容瞻氣象圓通天眼悟根因翠峰得師欲

上伏牛心未了了心應待再來身

不事饅頭不坐禪揚眉瞬目見雄談淨體髮鬚元不礙翠峰不煉

心妻妾宿曾參翠峰為僧後入俗年年航海精誠在垂沒魂還到海南

千龕翠峰一生鑄佛造無年航海精誠在垂沒魂還到海南

自愧迂儒厭俗葷每游香室藉思薰別來常似一臂失話久空容

六耳聞人去忽驚函谷履錫飛無復海東雲憐君鑄佛經千億欲

借餘銅一鑄君

錢心漁輓詩

心漁先生不可見尚憶吹簫臥草堂垂綸老作江潭客得姓元從

吳越王貧病一生心自足雲山千里興難忘更聞治命真堪紀人

世空矜石榔藏

雪詩和蘇韻十首

陰風吹隴麥芽纖歲盡玄冥令更嚴圍圃未春先綴蘂乾坤如海

欲生鹽不妨積處堪高臥預想晴來好曝簷縱是未能堅作玉漸

看冰柱已垂尖

大地文章散縞織小堂風物倍清嚴灑來竹裏迷人徑積向巖前

訝虎鹽但使曉寒欺短褐獨宜久影泛虛簷瓊花柳絮皆無用誰

擬新詞一鬪尖

寒江我亦弄纖纖豈是羊裘人姓嚴履處幸不露足趾嚙餘真覺

厭酸鹽紫雲黃竹千年調白屋朱門一樣簷高岫儘教遮蓋盡物

情元自礙孤尖

寒皋白草尚餘纖墜戶村村似戒嚴飛舞千峰山吐練妝成幾樹

木蒸鹽滇蜀有病多消渴宜調茗老已捐書莫映簷強欲摘毫追

小謝詞鋒久避六朝尖

宛轉素娥腰帶纖迴颺似應舞節嚴三冬怪事驚粵客一夜淒風

結解鹽厭說魚羔歡錦帳思分挾續到窮簷擒胡此日堪乘便誰  
奪祈連萬勿尖

蕭蕭凍樹晚誼鷓門外誰來長者車入夜似驚千里月開簷相對  
滿空花東郭先生猶敝履西關遷客正思家最憐漁父滄江畔閒

倚孤舟獨挺義

一片寒原滿樹鷓幽人掩戶罷柴車聊憑濁酒延春色試向疏梅

問臘花草閣映來書幾卷江城積處月千家此時忽憶荆溪道雲

際雙峰聳玉義

初看朝采颺金鷓倏見玄雲隱日車恰似幻師能作霧卻驚翳眼

驟生花細編暫借簷前影銀閣常思夢裏家笑道非鹽亦非白禪

機一指爲君義

空城無粟噪饑鷓陌上紛紛正滿車積礪暗隨泉並滴入簾應與

筆爭花芻米驟高新歲價柴扉旋掃野人家客來此日須沽酒梁

上青錢那得義

巢風欲動始占鴉空裏愁翻百寶車蔥嶺未消阿耨水珠林忽散  
鬢陀花故氈猶在能禁冷好客相尋懶臥家且似瞿曇逃世網雪

山脚坐足爲義

家僮自野田攜黃菊二株至軒中感而有作三首

曠野陰陰萬木霜誰攜數藥到茆堂冷質本非堪競秀閒情敢謂

愛孤芳在野盃辭眾草掩入簾聊作滿庭香自笑吾生花興少欣

然對爾亦相忘余素不好花見此不覺有喜  
意豈真所謂花之隱逸者耶

已拚寒谷不須媒讓寵何嫌並朵開花意幽閒當豔麗天心霜霰

是栽培潯陽逸客膏騰醉姑射仙人綽約來寂寞於人誠少用試

將服食制齡頽

不沾春色也穠纖小院疏籬祕靚巖人比孤花清入聖天然真味

淡非鹽未須采擇供調藥爲嗅馨香置近簷落英好護餘根在來

歲還看茁玉尖

此首用坡  
公雪詩韻

漂布架二首



皎皎亦知塵易染置身特在半虛空素娥罷浴仍餘溼靚女憑高  
欲御風潮翻淨練江樓上霧捲輕綃海市中不向太陽蒙一暴翦  
裁誰使得成功

娟娟素質寄孤標出浴仙娥溼未銷弄影自知迎日早憑虛特覺  
去塵遙將乘灑氣晞冰骨一任輕颺颺舞腰移向海傍堪望處錯  
疑鮫室挂寒綃

鞦韆架二首

毵毛水打初成鞦餘溼還應待日消禦冷何辭居下體負暄早已  
託高標似隨仙鳥乘雲近未跟芳塵去地遙卻訝緣撞諸侂子倒  
投絕足試輕趨

鞦材溫厚翦羔羣絨初勻溼未熏就日且須緣峻木凌波將不  
讓羅紋色迷玉磬齊懸簾影伴仙鳥半入雲終屬美人施錦糸畫  
簷風起暫繽紛

病中食江魚作自海寇亂此魚不至者六年矣

腥風暫說靜鮫潭石首新嘗到草菴常味番令食指動病身未覺  
水鮮甘試和芹子心仍在欲薦椿庭恨豈堪莫謂有無關口腹安  
危消息繫江南

弟兒次江魚詩韻深不稱意偶坐水榭無事再疊前韻教之

罟舶夷舟遞占潭凌人忽爲啓冰菴百船十死眾爭利一尾半金  
人買甘偶嘗貧士已知足數飽豪家亦未堪遙憶金盤充貢處九  
重當食念江南

次韻題王孟端春流出峽圖

錦江一派自天開誰寫春流映翠臺萬本深中疑欲斷千崖裂處  
訝還來蒸成暖浪魚翻尺繞向仙家客渡杯瀑挂玉龍如起蟄沫  
飛野馬似吹埃探源詎識臨河意乘木誰堪涉險才近水人家巢  
鶴鶴遠山天際落莓苔趁流蜀賈回輕舸燒野巴僮墾廢萊萬里  
風煙真縮地丹青技益至此哉

滿屋春流訝眼開丹青彷彿見章臺曉經神女和雲度寒盡天山

帶雪來合勢兩涯誰辨馬潛行一綫僅勝杯戲暖魚龍恰不夜漱  
川花竹總無埃沿洄欲問幽人住險絕堪矜蹈水才荆巫信有四  
時雨濫頽全銷一點苔祠識黃牛多古本城迷白帝半荒萊吾生  
本是東吳客萬里西遊亦壯哉孔明送蜀使故事

山居

檜榆徙海鵬鳩笑續短裁長鳧鶴悲山翁未解稽生癖垢面蓬頭  
也自宜

讀王遵巖所爲拙集序文自嘲四首

嚶嚶妄意空千載沒沒安能蓋一鄉江東若問如卿比車載還應  
更斗量

文章未出風土外人品猶纏習氣中只可清狂慣吳語卻令識字  
笑吳蒙

札也能輕千乘國蹈道無能早見譏三十年來持戒意於今四十  
已知非

力希顏氏何能望竊比言游未敢安老大漸知親灑掃試將妙用  
此中參

紀夢

萬里歸心促曉雞滿巖寒月正街西道人久謝天台夢也學劉郎  
一度迷

有司查腳色二首

道士原無鑑湖賜山人敢署醉侯封猶查腳色煩官府陳渡橋邊  
一老農

逃名最喜稱無姓抱病還應厭有身說著宦游如一夢不知猶是  
籍中人

游塘候巡公四首

公門幾歲罷趨趨俯仰衡茅公晏如豈謂鬢毛蕭瑟久尚隨疆吏  
路傍趨

沙堤月色曉朦朧曾向朱門候相公逢迎不意猶能慣回首當年

似夢中

樗散空知慕鑿坏柴關終歲更慵開今日偶成蝴蝶夢也隨花氣  
過牆來

禍生狂態復如何一刺懷中半滅磨縱合罄折謁官長猶勝詩人

詠荷戈

海上凱歌九首贈湯將軍

湯侯猿臂猛虎鬚少小曾窺玄女符明主親頒手中劍直交跨海

斬天吳

紛紛盜竊爾何知岸上斫人水上嬉白蛇一身都是膽欲將巨海

作潢池

偃旗休角寂無猜百丈樓船泊不開夜半賊營流矢滿纔驚漢將

是飛來

水軍隊黃頭郎迎潮直上凌扶桑已知海若先清道萬里滄波

定不揚

海上秋高朝氣清營中賈勇競先鳴疊嶼亂翻旌幟影驚濤盡作

鼓鼙聲

沈船斬馘海為羶潭底潛蛟噴血涎鬪髀帶箭逐波去可道孫恩

是水仙

錦紈愛子亦從軍長鬣蒼頭總策勳誰奪強王萬金首帳前齊說

小郎君

五千長戟下淮邳自是沙洲命盡時將軍欲置平戎鼓須借鯨鯢

腹下皮

湯侯以渠賊  
王良皮製鼓

捷上彤庭寵數優詔分玉帶與名裘麾下偏裨盡稽首貂蟬笑看

出兜牟

南征歌十二首

五嶺烽煙久未平君王習戰幸昆明卻說將軍多勝算不須文士

請長纓

詔錫彤弓出禁城良家六郡總從行將軍舊佩平蠻印校尉新開

橫海營

漢皇有道伏羌胡南粵何知擅一隅萬里出師將問罪不因大海  
富明珠

獨承節鉞控南州親寵由來冠列侯昨夜輕寒生幕府賜衣初着  
紫貂裘

晴原羽騎簇油幢繡帽爭先蹋鞠場不惜千金收猛士欲將尺組  
繫名王

月明吹笛武陵川馬上行人望跼鳶莫怕炎洲饒毒癘一冬飛雪  
似胡天

軍書插羽速星奔叩焚夷王盡款門殺氣三秋清瘴海輕兵一夜  
襲崑崙

草木千山鼓角風將軍牧馬夜郎東靈臺向夕占星色已報欃槍  
墮海中

圍合孤城海氣昏紛紛失木泣窮猿何如銜璧歸天闕幸荷明王

不死恩

牂牁南去亂峯連滇海藤江一帶懸縱謂蠻封堪畫地不知漢將

若從天

奏凱歸來拜冕旒霍家襁緜更封侯因風爲報單于道漢闕方臬

越尉頭

千羣椎髻競來王聲教南流盡越裳但使文犀通貢獻不將銅柱

隔封疆

塞下曲贈翁東厓侍郎總制十八首

四月旌旂出白狼千山晴雪照油幢預知水草軍無乏試辨風雲

虜欲降

三晉連年苦被兵九重拊髀憶豪英詔書更不從中御萬里長城

一委卿

詩書禮樂古人風開闔機鈴又不窮得一胡兒如愛子用三敗將

立奇功

山前山後兵馬雄斧鉞衣裳在掌中俠士獻刀承賜酒貴侯免胄  
爲趨風

赤氣氤氳夜指天旄頭落地如火然曉來西山一塵戰奪得牛羊  
歸滿川

千金買之卻何爲一閒過於十萬師黠虜欲逃頭可購名王未獵  
客先知

太師昔日定南荒親把長纓繫莫王寄語老胡須自愛射飛休得  
近邊牆虜中謂大

梯懸半綆哨臺高胡漢鄰家隔一壕數日虜中無動靜古囊東去  
戰黃毛

虎翼龍翻大將旗逆驅流電走妖魍陣前捉得胡王女賜與營中  
厮養兒

灑川冰盡水泱泱堡堡人家喚蒔秧田中每得鳥獸骨云是胡王  
舊獵場

馬邑邊胡數被胡王黃叛漢更通胡帷中妙算能先發奪得黃旗  
與繡襦

健兒白馬紫金鞦不向沙場便酒樓夜來一賭青錢盡尙有囊中  
血髑髏

邊人大半能胡語胡騎年來亦漢裝誰向青紅氊帳裏單身縛得  
不花王

少年意氣五千斤鐵棒曾穿萬虜羣壯士從來不病死孤兒今屬  
羽林軍

君侯生長在炎洲塞外層冰草木愁祗憐軍士猶寒色臘盡轅門  
不御裘

畫戟森森清晝閒指揮只是笑談閒收將漢地教耕去捕得蕃酋  
命縱還

營平謀國最深忠每與公卿見不同但使湟中無寇盜不須麾下  
有邊功

青青塞草羽書稀  
士女鼾眠畜牧肥  
戲看侍兒呈舞馬  
醉邀幕客對彈碁

偶感十二首

蓋屋曾無一把茅  
姑蘇城外盡荒郊  
行人欲識郵亭處  
問是軍燒是賊燒  
賊來窺戶正臨妝  
虜得吳娃是孟姜  
簫鼓滿船催送酒  
大王今夜作新郎  
毒藥本能攻毒病  
病瘳藥發更堪論  
借問苗兵誰駕御  
遠觀元季近桃源  
勝敗於今自可明  
不調琴瑟也須更  
滿地髑髏多祝髮  
紛紛猶尙說僧兵  
詎道狼兵能賈勇  
渾身裹鐵怯如何  
不似江東輕俊子  
袒衣黃帽去揮戈  
袒衣黃帽去揮戈  
一潰奔騰湧血河  
滿目更無刀箭孔  
背心攢簇

似蜂窠

諸城連接控吳中  
羣賊無知枉見攻  
誰識主人多勝算  
關門閉得不通風

匹夫亦足關輕重  
好共軍門仔細論  
吳楚不知收劇孟  
夏人還解

口張元

口來錦帳口口子倭入緋袍口口郎共道醜胡山  
海外醜胡原不

在他鄉

欲驗藏錢用水澆  
挖開錢谷地無毛  
首插片旂紅的的  
鄉人一一

去挑包

眉目粗頑髮指冠  
鄉人權作大王看  
鐵燒醋灌俱嘗盡  
笑殺無鬚

是宦官

奸細紛紛徧郡國  
丹陽奸細獲徧多  
舟人漁子應迴避  
賈客胡商孰敢過

觀道士祈雨二首

星壇步處雲隨合里邑喧呼道士功四海正霖霖雨急臥龍何日  
起隆中

巫舞商陽古有之神靈風雨灌壇時陰陽變理輸誰力祇遣兒童  
頌法師

歸自金陵宿白土

長路緇塵欲上衣暫投客館亦如歸不因野老來爭席豈解山人  
久息機

酬徐養齋尙書見懷之作亦以少頌盛德并爲扣關先容云耳二  
首

卜居祇爲謝塵緣三尺繩牀亦穩眠縱是炎天非雪夜終須乘興  
到前川

柴門長日閉青山薜荔衣裳冰雪顏愧我未能分半榻藥囊書卷  
共消閒

送楊訓導擢曹州掌教二首

傳魁之世久知名君作師儒更有聲已道江東桃李徧春風還被  
魯諸生

皋比幾歲臥江城絳帳談經復此行廣文不厭青氈冷京兆猶傳

白雪聲君先人尙書公嘗爲京兆尹有清名爲奄瑾所禍

贈徐愛杏山人詩有序

壬寅秋七月余偶識山人於錫山山人善醫尤精金創以爲其

父傳之異人也山人治病投一匙於垂絕無不應手愈余因思

南史所載一人因斫蛇而獲靈藥自是出入行陣金創被體以

藥塗之盡效相傳以爲奇雖然使其人當時得遇如山人者又

何假於孽蛇之餘也哉邇者戎馬蹂躪鳴鏑徧野邊人之橫罹

於毒者何可勝數向使致山人於塞垣軍旅之間人且爭忍死

而趨之以兩命焉者如織矣而乃漠然自老於江南無事百年

不見兵革之墟則抱其技而寂寂焉固其理也諺云士視其所  
遇苟不在中流雖五石之瓠奚所用之嘻豈獨醫哉會山人來

求余詩而吾友靜思武陵二君皆介爲之請率爾賦此且序以見余意而詩次句用南史事云

一卷禁方誰與傳雙童擣藥幾經年園中種杏今多少疑爾前身是董仙

題贈段紫峯

仙人宿處紫煙孤一片峯陰散玉湖今日隱身城郭裏閉門常寫廬山圖

秋日書客童君見過賦此爲贈

有客扁舟問草廬窗前梧葉正蕭疏山人已得忘筌意不復從君乞異書

題陳推官羅江號二首

高臥曾分白鷺沙清谿深處采三花總爲徵書出空谷衣裳猶自染雲霞

三山江畔入雲齊紫氣千年鎖石堤便欲學仙從此去與君同聽

夜猿嘯

題寶華和尚卷

幻目由來見幻華飲光何事又拈華兩華舉似知華客爲有別差無別差

贈王和尚住善卷

偃柏垂蘿古洞春上人飛錫此何因非關福地尋仙侶自向青山認法身

自述贈寫真毛君

津黑尚餘山澤氣委蛇又似列仙矍他年太史徵圖書爲識乾坤一腐儒

贈曹星士一江

春雨蘭陵江草生江流恰與道心清門前車馬日來往閒坐江城說子平

自述并贈曹君



少讀陰符恥未工  
青山偃仰漸成翁  
人間炎冷都忘盡  
聽話流年一笑中

曉起觀猫捕鼠

起來隱几坐朝暾  
深謝當關早閉門  
簷角偶欣猫捕鼠  
反觀尚覺殺心存

題畫

山空夜盡猿一鳴  
磴轉雲深鳥不度  
幽人何事長獨棲  
只爲此中有佳處

廉使廖東雱喪後開所惠地黄酒臨觴慘然

尺書滿篋故人情  
想像荒邱宿草生  
祇餘此日開尊意  
堪作山陽聽笛聲

贈儀真沙君

葭莢蒼蒼水國秋  
高樓明月古揚州  
二十四橋雲霧裏  
看君騎鶴上天遊

贈史君漁沙

問君何處挂漁簑  
予亦垂綸坐綠波  
他日相逢應一笑  
不知若箇得魚多

華補菴三度惠酒而此番所惠參酒者絕清冽可人雖味甚濃厚而置之杯中淡若無色可謂嘉品因劇飲至醉遂成口號奉謝

三首

磁杯寫盡只疑空  
秋月寒潭意頗同  
隱几偶然成獨酌  
夜涼白露滿庭中

每甘樗散惟須酒  
欲補虛羸卻藉參  
瘵疾陶生兼好飲  
舉杯深見故人心

絕無色相傾明水  
只有馨香藉白茅  
此夕飲醇拚一醉  
恰如把臂與公文

食石首魚又得鯧  
勒二魚喜作口號  
向時石首每至郡  
鯧勒亦不至也非海氛漸息何以有此

昔年石首又成羹  
鯪勒相隨亦就烹  
應是鯨鯢先授首  
紛紛水族盡亡生

凶狀腹前排劍戟  
勒凶謀腹裏漲彭亨  
網性命惟堪一筴輕  
細三魚狀亦最可惡  
吾師自有截江

唐荆川先生文集卷之三

唐荆川先生文集卷之四

詩

三屯營閱兵薊鎮總兵開府處

股肱北平郡烽火度遼營  
特以郎官節來巡都護兵  
橐駝參陣馬  
簞策應軍証三令先庚後  
八門死地生妖星枉矢墮  
殺氣葶收行象綴吳都燧  
羊分宋士羹生羌休近塞  
熟虜敢渝盟閱罷時登眺  
紅螺憶古城

喜峯口觀三衛貢馬

貢馬走東胡關門控北都  
每逢金鏡節來獻玉驄  
駒酋長花當後  
山川松漠紆天衣沾蚪  
蟻國馬出駒駝乞賞孫  
隨祖專兵婦代夫  
珥璫珠落錯襁褓錦毼  
毼槃舞呈鞞革休言譯  
象胥白狼回右袵  
黑水作通衢明堂端拱日  
王會正堪圖  
白乍浦下海至舟山入舟  
風惡四鼓發舟風恬日  
霽波面如鏡舟  
人以爲海上罕遇是日行  
六百五十餘里

島夷頻不靜玉節遠何之誓清萬里寇敢憚一身危閩卒精風候  
吳兒慣水嬉黃頭紛百隊白羽颺千旗擊鼓靈鼉應揮戈海上隨  
龍驚冬不蟄鮫畏晝停絲昨夜波潮怒中霄雲霧披天澄鏡光發  
風嫩縠紋滋鄒衍瀛洲數莊生秋水詞乾坤元莽闢人世自牽羈  
已傍漁山泊還尋馬跡期日昇看暑轉途變識鉞移雙嶼崖門險  
半洋礁石奇從來惟賊路今日有王師待獻經營績三山勒一碑  
謁夷齊廟二首

未訪箕山塚來經孤竹墟精光猶日月冠冕肯泥塗國合歸中子  
心元避獨夫千年北海轍還見盍歸乎  
歸周仍避紂渭叟况同襟叩馬何饒舌采薇還苦吟當年諫武意  
昔日事般心生死知音在明夷用獨深  
叩馬之說不經見而詳於太史氏夫子止稱伯夷求仁得仁而  
孟軻氏以為夷與太公同避紂歸周而倡天下以從周然則助  
成周之王業者夷與太公也太公鷹揚而夷諫與夫既已身遠

避之而又諫伐之者既已助成其王業而又復諫止之皆疑於  
不類此王臨川輩所以據孟氏以證史遷之誣也嘗思之而得  
其說夷之歸周歸文王也文王終身事般伯夷叩馬而諫然則  
始終與伯夷同心者文王也文武父子一道然夫子稱文王至  
德而未盡善於武則微意亦可知矣夷之歸周不嫌於同其父  
而不同其子其與太公亦不嫌於始同而終異也遷之說其亦  
未可以為誣哉

古北口觀降虜步射復戲馬馳射至夜  
潮河北來幾千里夾岸穹廬雜軍壘傳聞漢官旌節至驚咄歡迎  
競羅跪抹額貂皮并繫腰胡婦赤腳胡兒履中有老胡能漢語辯  
髮一條銀鼠尾告言天煖弓力弱箭垛乞移三四尺蹲腰擲目滿  
彎弧箭箭齊奔月兒裏當軒賜與錦纏頭漢人喝采胡人喜自矜  
長技正未竭一躍上馬事馳突珠帽半仄賣敵邪鐵驄驕嘶弄錦  
飢可憐人馬如爭巧人藏馬腹馬人立翻身倒臥馬背上馬尾鬣

鬆亂人髮忽然馬去不聞聲一路驚塵向空沒滿眼流星透煙霧  
道是胡兒飛箭發想見天山射鵰時意氣雄豪誰可越騎歸人散  
悄無誼卻卻牙旗捲秋月

山海關陳職方邀登觀海亭作

萬里羣山盡海頭誰築關城控上游巨靈劈山鬼鞭石英雄作事  
與神謀水壓蛟龍蟄深窟陸斷豺虎潛遐陬司馬分符來作鎮坐  
銷奸宄護神州夜半鳴雞空獻計囊中置人仍被搜魏冉故事深秋邀  
我觀海樓水滌初清海霧收風恬浪細魚鱗起隔岸隱隱見東牟  
百年海禁頗嚴密煙波莽闊無行舟

盧龍行

詠田疇

公孫昔日據玄菟北連蹋頓騁狼顧曹公萬里動征師到此沮洳  
不得渡田生義俠久知名駐車虛左親邀迎屏人慷慨談心腹兵  
家詭道先虛聲盧龍小路纔一騎佯言返旆潛度兵夜半遂斬名  
王首一矢不折鯨鯢清功成笑擲封侯印依然被褐返茅荆當時

策士如雲擁奇謀卻屬一書生山川寂歷霸圖歇薜蘿滿眼高蹤  
絕瀚海陰風鼓角悲燕山寒月挂旌旗祇餘今人守塞處猶似昔  
人出塞時俛仰乾坤一回首賢達伏藏何有不見華陰鬻屨生  
詎識平原賣漿叟自憐局促畏簡書安得停車訪巖藪

臥病作二首

孤蹤原自與時屯兩月即官半閉門藥石番為二豎笑精華祇覺  
百骸存魯門未慣爰居性楚客愁窺虎豹闥卻憶扁舟秋泛處洞  
庭木葉水波翻

閒情已覺釣非釣末路久居才不才燭武本非食肉相無鹽亦被  
入宮猜雍容佩玉身難置馳騁兵戈心又灰擊劍讀書堪自笑昨  
非今是好歸來

至職方作余初釋褐補官武選主事今適三十年

畫省棲遲已卅年今來似有再生緣署郎馮叟何言晚薄望東坡  
半是仙心事江湖思報主兵戈南北愧籌邊簿書若謂真成懶日

畫先天幾箇圈

再官京師懷趙浚谷中丞

江潭詎意復修門舊侶京華訝幾存跡比孤雲難有託心思公子  
欲何言太白幾時還避書鬼方計日想稱藩李廣雁門今罷守短

衣獵騎正秋原

密雲閣兵作

亭微逢秋雕羽輕良家六郡試雄兵一夫天險盧龍塞萬炬星飛  
翼虎營清笳乍歇聞鳴鏑突騎纔迴見伏旌有道四夷方設守年

年長此護神京

渡潮河

流淺沙明自可憐未經秋潦轉澄然馬腹浮河仍飲水甲光映日  
更搖川幾處穹廬移就草數家甌脫曲依泉沿堤猶見青楊柳祇

覺南州鄉思懸

夜上石塘嶺關

白河入口石塘城上流元自古開平巖立星辰孤墮影野清刁斗  
空傳聲戍樓倚月橫吹動虜帳燒腥遠火明魏將殞身曾此地邊

人語及尚沾纓

正德末年魏參將祥被難於此

石塘道中

高城落日雁飛斜數畝沙田稻亦花路繞曲河十八度人棲礮石  
兩三家埃煙山靄爭明滅戍笛秋聲并慘嗟聞道松亭遣探騎時

時愁被熟胡遮

古北口城此城雄據山頂茲武靈之經略也

諸城皆在山之坳此城冠山鳥巢鼓角千峯虎旅散漢夷一路  
犬牙交熟胡生虜遞番覆怪石崩川爭怒號到此令人思猛士天

山萬里縱鳴笳

宿黃厓營

棲棲終日旅邊城夜向黃厓問古營幾家戍鼓漁陽操聯騎鐃歌  
薊北行峽東雨湫高怒水山凹樹竅激秋聲躍馬壯年微志在不

緣此地客心驚

遊遵化湯泉

絕塞逢秋已覺涼此中氣候訝非常流金每似臨三伏晞髮真成  
向九陽山煙靄分朝潤草色青青敵夜霜我亦臨流堪一笑稽

生盥浴久相忘余有稽康之癖不沐者廿年

登喜峯古城時三衛貢馬散牧塞外

絕頂孤峯見廢關短衣落日試躋攀三秋豹旅方乘障萬里龍媒  
正滿山候雁似隨鄉思去寒花將送使臣還籌邊迂薄真無補空

望伊吾抵掌閒

曉發喜峯

客心流水與爭馳寒壘疎星度峽時未返王孫猶草色初來戍卒  
是瓜期去鄉祇覺蟬聲似出塞方知馬脊危辛苦下情何計達早  
年曾誦采薇詩

入秋久矣餘熱尚在閏月十五日太平寨始見秋色

漫漫嵐氣半晴陰撼撼庭柯葉亂吟始覺孟秋雲物至因知宴歲  
旅情深孤鶩影貼寒巖草鳴咽聲連野戍砧戈甲滿山乘塞卒天  
驕何處欲相侵

月下小坐書懷

滿庭圓月坐孤松聊息塵機長道容任俠早知同畫虎談兵晚更  
笑屠龍文離避疾猶分粟泔泔乘時亦請封蕙帳故山應待久尚  
從長樂聽鳴鐘

寄姜白二子

日閱兵容夜馬蹏孤懷猶畏簡書稽眼申親識皆□□夢裏經營  
亦鼓鼙畫省薰香行載橐石渠校籍坐然藜寄語雍容鳴玉子可  
能相念到遼西

薊鎮憶弟正之試南都

伏櫪衰年久自甘爾兄迂闊爾偏諳心窺祕算逢人噤篋貯陰符  
向夜探犀渚青楓煙際棹龍沙白草露中驂雁行正笑難如雁飛

去飛來北又南

狗馬病多經絕塞棣華室遠隔南天每思原上聽鳴鶴  
訝山頭望跼焉可以去乎仍戀祿無能爲也更籌邊頭顱長盡山林骨木  
食莎衣信有緣

還姜白二子衣

試整戎裝出漢宮解衣何意故人同野容聊免披顛倒命服堪將  
襯黝蔥孔陽爲映朱旗色借姜稍敝因經紫塞風今日還君篋笥裏依然搖曳禁垣中

副總兵馬芳芳陷虜中十二年而歸在虜中亦稱爲驍將

穹廬元以射雕稱一騎當先萬馬騰意氣肯甘胡地老勳名終屬  
漢壇登斫殘右臂方揮刃殪盡追鋒未釋冰歸自虜中還破虜古  
來名將亦誰曾

謁夷齊廟

爲仰風流百世稀長歌招隱坐漁磯昔人何處羣麋鹿此地深秋

尚蕨薇征誅揖遜有今古餓顯祿隱無是非但使斯人皆可侶不  
妨到處坐朝衣

八月五日順義道中望闕一首時近萬壽節四日也

幾時承遣出彤闈寒暑俄驚節候非霜隕塞門猶葛屨風淒朔野  
亦絺衣中秋誕聖金晶會百里瞻天紫氣圍日與長安俱近處莫  
陪鵷列轉依依

順義公館次壁間韻

虜入山前山後州控弦萬騎此屯留四郊壘壁猶餘警十載瘡痍  
尚未收野長蒿萊仍課馬兵僉子弟更防秋使臣多愧詢民瘼自  
詠小東誰爲酬

登懷柔城二首

塞下孤城古白檀半臨平野半依山秋來亭徼無烽火官馬千家  
苜蓿閒

小邑蕭條恰似村日中市井已扃門山田砂礫希禾黍只有城西

種果園

黃花鎮拜聖誕

珥貂扃砌曾為吏握節封疆又此行近日長安無百里星河帝座  
正三更蕭韶律應軍中樂羽衛光搖塞上旌廿載遠顏江海遠卻  
因咫尺重含情

月夜渡蛟門

海人相傳蛟門波浪最惡如江之峽也

大洋萬里無拳石卻見羣山巨海中忽然石壁開雙峽坐覺樓船  
聳半空島以戶寬延滿月潮緣口窄弄驚風誰能一矢穿蛟窟祇  
憶樅陽漢武雄

三沙抱病夜坐東梅林督府

領軍韋叡本清癯藥裏常隨倚劍餘日御短衣巡壁壘夜支倦體  
閱軍書莫愁深葦難搜薙試算窮巢易掃除虎將眼中誰可仗仁  
聞幕府策何如

和陳黃潭東歸一首

吾亦欲歸讓公早此行不異登仙好試看苦戰東海塵何似高眠  
北窗曉寗情鳧鶴任短長世事鵲鳩誰拙巧他年約訪祝融峰爛  
煮青精相對老

浙中流言王遊擊喪師二千者又聞總督梅林公將至太倉詩

以自答并以志喜云耳

兵略元非素所聞疏才多愧薦書勤自知薄相難成事共笑狂謀  
易僨軍雄閩豈堪分玉節巖扉祇合伴松雲東山繡斧深懸望仁  
看神機靜海氛

三沙病後夜起翫月書懷

軍中元不解衣裳夜倚危檣歌慨慷已慣羸軀常食少從教短髮  
尙心長海能儘月空無水潮定期風颭有鉞不為督師經遠涉何  
由此地玩清光

潮長落至三分以上必起猛風一番每潮汐皆然蓋潮自生風  
非關大塊噫氣與虎嘯而風列一理此非久在海上者不能知



所以儒家未之言及惟潮與月與風與陰類然則潮之應月又何疑也

海上歸來病手足瘡兼血疾伏枕

瘦骨迂才堪竊笑豈能萬里事橫行一身自試妖狐穴

三沙入賊巢與賊對

面止隔箭餘地

六月深驅瘴海兵陳湯擊痺緣西域韋叡虛羸爲北征

我愧古人無萬一卻令二病偶然并

赴官揚州與左妹夫兩弟鶴兒白壻登金山坐禪房一首

衰顏久欲寄名山江國征師幾往還隔水空知戀桑梓紆籌豈足

靜夷蠻淮天鶴唳軍聲壯海戍烏棲戰舸閒時倭寇剿盡海氛漸息縱是維

揚迎帥急道人且坐白雲關

題牆子嶺公署中偃松署本參將府也

塞垣飽歷雪霜寒直上無枝只屈盤邊人自識將軍樹我來權喚

大夫官

游湯泉四首

幽都自古號寒門重纘年年亦不溫信有燭龍蟠地底亂泉噴出  
火珠翻

坐看池底絢霞光疑是蓮花火裏藏借問幻師誰會此乾坤爐冶

炭陰陽

戎馬驅馳未息鞍春風沂曲一盤桓試憑活水洪鑪煖暫解儒生

徹骨寒

萬樹不知霜信至兩崖時見火雲升一就薰蒸聊可喜久來還想

玉壺冰

宿七家嶺驛次壁閒韻

莽莽沙河水分流亦有涯瓶罌開小市蓬葦擁寒沙去縣無百里

依山僅七家偶然成一宿聊喜息紛華

食蒜

三食齏粥猶嫌穢百味葷腥久不嘗頃來食蒜如飡蜜已換山中

一副腸

題豐潤寺中古鐘

腰下已磨臆氏舞頂閒僅屬禹王堆外國奇文翻不出山僧道是

海中來

遊鐵壁

一峯特竦如削鐵古松根透石紋裂我欲峯頭看八荒安得手中

憑九節

銀山寺說法臺

秋山面面翠屏迴孤石支撐說法臺想見高僧開口處諸峯曾與

點頭來

橫嶺

一畚石與一畚錢懸綆千尋未及泉吹玉往時猶可詫汲金此地

更堪憐

七夕公館憶海上二首

牛女雙星隔水明一年一渡尚心驚天河風浪何如海海上征人

晝夜行

一水盈盈幾許遙猶煩靈鵲為填橋千年精衛空銜石漲海煙波

只自饒



遊盤山賦

惟陰陽之陶冶冥賴倒乎兩儀天星殞而為石駭滿山之置棊搜  
萬象以效珍何殊狀而相亞或藉草而羊眠諒仙術之幻詐或負  
隅而虎蹲詭飲羽之神射或餽餽而欲走類靈鞭之叱咤或屹立  
而不動豈思婦之所化既簇隊以縱橫亦累卵而高下紆十步而  
九曲枉矢乎石罅逮礧礧之歷盡忽拔起乎孤峯仰子孫之千  
億儼高峙而稱宗倚禪宮而凝睇曠天宇之澄空向之紛紛怪石  
忽若懷寶而藏弓但見夫萬木蒼翳而青蔥一勺之泉大旱而不  
竭兮人言其下潛乎蛟龍女蘿薜荔紛披而交映兮七十二寺隱  
見森羅乎其中疑有悲歌慨慷之士不得志而自隱與夫仙靈逸  
客往來而相從欲即之而無路兮時見一二野僧啓巖扉而鳴鐘

修佛廬之繁夥歷歲久而不蕪饒萬樹之梨栗以衣食乎其徒何  
藁木之岑鬱無一鳥之孤棲餘邊城之殺氣警羽鏃而遐躋泉觸  
石而鳴箏松受風而響濤時琤琮而乍噎倏悲吟而怒號憶連旬  
之巡歷屢金鼓之嘈嘈審聞性之不異任羣籟之相遭適儻恍而  
延伫忽四山之暝色謝耳目於送迎向僧齋而偃息恍夢景之如  
醒覺餘興之未極晨起歷乎上盤境逾奇而路逾棘方踏躬而俯  
穿又縮足而仰捫驚半踵之在外愁欲度之猿狖得平柯於高頂  
接雲開之飛翼山童香而無木響草蟲之唧唧岫遠拱而戟森岡  
近繞而弧彎乃下瞰乎城郭曾不盈於一環類黃鵠之再舉見紆  
曲而覩圓方悲人生之局促恆豐藟以自藏眺溟渤之南匯子碣  
石之中巉轉秬稻於東吳駛萬里之雲帆笑卅鐘而石致曾不及  
乎凌波之艤連岡北矚天設柱列墉分戍隔限爲柝把都打來  
孰敢予侮嗤熟胡之桀黠乞哨卒之餘俎雖烽火之暫虞疑金城  
之永固惟山勢之旣極俄湧塔之天造顯佛牙之光怪騰麗空之

碑礪覽小道其若斯信精神之爲寶胡俛仰而成陳忽徬徨以回  
步悵中心之有違足屢卻而返顧與流泉以偕逝睠巖阿而長憶  
豈淹畱之無心畏簡書之偏仄





并身四



